



宋槧太平御覽



16  
403  
83



13  
403  
83



太平御覽卷第五百二十五

禮儀部四

祭禮中

禮記祭義曰祭不欲數數則煩煩則不敬祭不欲疏疏則怠怠則忘是故君子合諸天道春禘秋嘗霜露既降君子履之必有怵惕之心如將見之又曰文王之祭也事死者如事生祭之明日明發不寐饗而致之又從而思之祭之日樂與哀半饗之必樂已至必哀又曰郊之祭大報天而主日配以月夏后氏祭其闈殷人祭其陽周人祭日以朝及闇祭日於壇祭月於坎以別幽明以制上下祭日於東祭月於西以別內外以端其位日



新念圖書

此係明治八年八月八日  
所購以贈  
田中  
田中  
田中

出於東月生於西陰陽長短終始相巡以致天下之和  
 又日祭之日入室儼然必有見乎其位周還出戶肅然必  
 有聞乎其容聲出戶而聽愾然必有聞乎其嘆息之聲周還  
出戶謂薦設時也無尸者闔  
 又日孝子將祭慮事不可以不豫比時具物不可以不備  
 虛中以治之此時猶先時也虛中言不兼念餘事宮室既脩牆屋既設百物  
 既備夫婦齋戒沐浴盛服奉承而進之洞洞乎屬屬乎如  
 弗勝如將失之其孝敬之心至也與修設謂掃薦其薦俎  
 序其禮樂備其百官奉承而進之百官助主人進之於是論其志  
 意以其恍惚以與神明交庶或饗之庶或饗之孝子之志  
 也

又祭統曰凡治人之道莫急於禮禮有五經莫重於祭禮有五經謂吉禮凶禮賓禮軍禮嘉禮也莫重於祭謂以吉禮為首也夫祭者非物自外至者

也自中出生生於心也心怵而奉之以禮是故唯賢者能盡  
 祭之義怵感念親之貌也賢者之祭也必受其福非世所謂福也  
 福者備也備者百順之名也無所不順者之謂備言內盡  
 於己而外順於道也忠臣以事其君孝子以事於親其本  
 一也

又日祭者所以追養繼孝也孝者畜也順於道不逆於於  
 倫是之謂畜畜謂順於德教是故孝子之事親也有三道焉生則  
 養歿則喪喪畢則祭養則觀其順也喪則觀其哀也祭則  
 觀其敬而時也盡此三道者孝子之行也歿終也  
 又日夫祭有十倫焉見事鬼神之道焉見君臣之義焉見  
 父子之倫焉見貴賤之等焉見親疎之殺焉見爵賞之施  
 焉見夫婦之別焉見政事之均焉見長幼之序焉見上下  
 之際焉此之謂十倫倫猶義也

又曰凡祭有四時春祭曰禘夏祭曰禘秋祭曰嘗冬祭曰  
謂夏殷烝謂禮也禘禘陽義也嘗烝陰義也禘者陽之盛也嘗者

陰之盛也故曰莫重於禘嘗夏者尊卑著而秋萬物成  
又曰周公且有勳勞於天下成王康王追念周公之所以  
勳勞者而欲尊魯故賜之以重祭外祭則郊社是也內祭  
則大嘗禘是也言此者善周公功也

又表記曰祭極敬不繼之以樂朝極辨不繼之以倦極猶  
辨分別政事也祭義曰祭之日樂與哀半饗之必樂已至必哀

又曰子曰后稷之祀易富也其辭恭其欲儉其祿及子孫  
富之言備也以傳世之祿共儉者之祭易備也

禮稽命徵曰天子祭天地宗廟六宗五嶽得其宜則五穀  
豐雷雨時至四夷貢物青白黃馬黃龍翔黃雀集坤為地  
五穀豐矣土精上為軒轅主雷雨得宜故又應時至也四讀四輔故四夷各貢方色之馬也土精為馬不言赤黑義

足通也黃龍黃雀皆土精也

周易豫象曰雷出地奮豫先王以作樂崇德殷薦之上帝  
以配祖考

又困九五曰利用祭祀祭祀所以象曰利用祭祀受福也

又既濟曰九五東鄰殺牛不如西鄰之禴祭實受其福祭牛  
之盛者也禴祭之薄者也居既濟之時而勉尊位物皆濟矣將何為焉其所務者祭祀而已祭祀之盛莫盛修德故  
沼泚之毛藉藜之菜可羞於鬼神故黍稷非馨明德惟馨是以東鄰殺牛不如西鄰之禴祭實受其福也  
又觀曰觀盥而不薦有孚顒若王道之可觀者莫盛乎宗  
盥也至薦簡略不足復觀

又萃曰萃亨王假有廟假至也王以豕曰王假有廟致孝  
享也全聚乃得致

左傳桓公曰凡祀啓蟄而郊言凡祀通下三句天地宗廟  
天南龍見而雩龍見建巳之月蒼龍宿之體昏見東方萬物始盛待雨而大故祭天遠為百穀祈膏

雨始殺而嘗建酉之月陰氣始殺嘉閉蟄而烝建亥之月萬物皆成可薦者衆故烝祭宗廟

又僖上曰五年晉人執虞公而修虞祀歸其職貢於玉命也

又僖中曰初平王東遷也辛有適伊川辛有周大夫也見被髮而祭於野者曰不及百年此其戎乎其禮先亡矣秋秦晉遷陸渾之戎于伊川

又僖下曰夏四月卜郊不從乃免牲非禮也猶三望亦非禮也禮不卜常祀而卜其牲日牛卜日日牲牲成而卜郊上怠慢也望郊之細也不郊亦無望可也

又僖下曰衛成公夢康叔曰相奪予享相夏后啓之孫也居帝丘享祭也

公命祀相甯武子曰不可鬼神非其族類不歆其祀杞郕何事相之不享於此久矣非衛之罪也不可以閒成王周

公之命祀請改祀命改祀相之命也

又文上曰大事于太廟躋僖公逆祀也僖是閔公兄不得為父子嘗為臣位

應在下今令居閔上故曰逆祀也於是夏父弗忌為宗伯昭穆之禮也

僖公且明見曰吾見新鬼大故鬼小新鬼僖公既為兄死時年又長也故鬼閔公死時年小弗忌

明言其所見也先大後小順也躋聖賢明也言以僖公為聖賢也

明順禮也君子以為失禮禮無不順祀國之大事也而逆

之可謂禮乎子雖齊聖不先父食久矣故禹不先鯀湯不

先契鯀禹父契湯十二世祖文武不先不窋不窋后稷子也宋祖帝乙鄭祖

厲王猶上祖也仲尼曰臧文仲其不智者三作虛器謂居節藻也縱逆祀躋僖公祀爰居三不智也魯東門外文仲以

為神命國人祀之

又昭二曰鄭子產聘于晉韓宣子曰寡君寢疾今夢黃熊

入寢門其何厲鬼也對曰昔堯殛鯀于羽山其神化為黃

熊

熊以入于羽淵實為夏郊三代祀之晉為盟主其或未之祀乎韓宣子祀夏郊晉侯有間

又曰晉侯問於史趙曰陳其遂亡乎對曰陳顓頊之後也舜重之以明德至胡公不淫故周賜之姓使祀虞帝臣聞盛德必百世祀虞之世數未也

公羊傳僖公曰曷為或言三卜或言四卜三卜禮也四卜非禮也三卜何以禮求吉之道三禘嘗不卜郊何以卜卜郊非禮也禮天子卜郊何以非禮魯郊非禮也禮故卜耳昔武王既沒成王幼周公攝行天子事制禮作樂致大平有王功周公薨成王以王禮葬之命魯使郊以彰周公之德非正故卜三吉魯郊何以非禮天子祭天諸侯祭土土謂天子有方望之事方望謂郊時所望祭四方群神及餘山川三無所不通諸侯山川有不在其封內者則不祭也曷為或言免牲或言免牛免牲禮也免牛非禮也免

牛何以非禮傷者曰牛三望者何望祭也然則曷祭祭泰山河海山川有能潤于百里者天子秩而祭之此皆助天宣氣布功故祭天觸石而出膚寸而合不崇朝而徧雨乎天下者唯泰山爾河海潤于千里

穀梁傳曰宮室不設不可以祭祭者薦其時也薦其敬也薦其義也非享味也

又僖公曰夏四月不時也四卜非禮也免牲者為之緇衣纁裳有司玄端奉送至於南郊免牛亦然乃者亡乎人之辭也猶者可以已之辭也

國語楚語曰屈到嗜芰有疾召其宗老而屬之屈到楚卿也芰菱也宗老曰祭我必以芰及祥宗老將薦芰屈建命宗臣屬託也去之建屈到之子木也宗老曰夫子屬之子木曰不然祭典有之曰國君有牛享大夫有羊饋士有豚犬之尊庶人有魚炙

之薦不羞珍異不陳庶侈夫子不以其私欲干國之典遂  
 不用  
 又日子期祀平王祭以牛俎於王子期楚平王之子結士也牛俎致俎於王也  
 問於觀射父曰祀牲何及對曰祀加于舉舉人君朔望天  
 子舉以太牢祀以會太牢牛羊豕也會亦諸侯舉以特牛  
 祀以太牢卿舉以少牢祀以特羊大夫舉以特牲祀以少  
 牢特牲豕也士食魚炙祀以特牲庶人食菜祀以魚上下有序  
 則民不慢王曰其小大何如對曰禘郊不過鬯栗烝嘗不  
 過握把王曰何其小也對曰夫神以精明臨下民故求備  
 物不求豐大是故先王之祀也以一純二精三牲四時五  
 色六律七事八種九祭十日十二辰以致之純心純一也二精玉帛也  
 三牲牛羊豕也四時春秋冬夏也五色五采服也六律黃  
 鍾大簇姑洗蕤賓夷則無射也七事天地人四時之物也  
 八種八音異種也九祭九州之助祭也十辰子至亥也百姓千品萬官億醜

兆民經入咳數以奉之百姓百官受氏姓也千品姓有敵  
 萬官官有十醜為億醜天子之田九明德以昭之和聲以  
 聽之以告徧至徧至光被四表則無不受休天子禘郊之  
 事必自射其牲王后必自親春其粢諸侯宗廟之事必自  
 射牛刲羊擊豕夫人必自春其盛況其下之人其誰敢不  
 戰兢以事百神  
 春秋繁露曰大雩者何旱祭也難者曰大旱乃雩祭而請  
 雨大水鳴鼓而攻社天地之所為陰陽之所起也或請焉  
 或怒焉何也曰大旱者陽滅陰也陽滅陰者尊壓卑也固  
 其義也雖大甚拜請之而已無敢有加也大水者陰滅陽  
 也陰滅陽者卑勝尊也故鳴鼓攻之朱絲而脅之為其不  
 義也  
 又曰古者歲四祭因四時所生熟而祭先祖父母也春日

祠祠者以正月始食菲也夏日禴禴者以四月煮麩餅也  
秋日嘗嘗者以七月嘗黍稷也冬日烝烝者以十月進初  
稻也

論語季氏曰季氏旅於泰山子謂冉有曰汝不能救與旅

名也諸侯祭山川在其邦內對曰不能子曰嗚呼曾謂泰

者今陪臣祭泰山非禮也

山不如林放乎孔子意云泰山之神

又曰祭如在祭神如神在子曰吾不與祭如不祭

孝經云春秋祭祀以時思之鄭玄注曰四時變易物有成

熟將欲食之先薦先祖念之若生不忘親也

爾雅曰春祭曰祠祠之言夏祭曰禘禘之言秋祭曰嘗嘗之言

也冬祭曰烝也祭天曰燔柴既祭積薪燒之祭地曰瘞埋既埋藏

也祭山曰瘞懸或瘞或懸置之於山祭川曰浮沈投祭

或沉或浮也祭星曰布布於地也祭風曰磔今俗當大道中磔狗

是類是禡師祭也師出征伐類於上既伯既禱馬祭也

馬祖也將用馬力禘大祭也

必先祭其先祖也商曰彤音融書曰夏曰復彤

周曰繹王午猶繹商曰彤音融書曰夏曰復彤

五經異義曰夏至天子親祀方澤侍中騎都尉賈逵說魯

無圜丘方澤之祭者周兼用六代禮樂魯下周用四代其

祭天之禮亦宜損於周故二至之日不祭天地也

又曰今易京說臣動養君其義理也必望利下弗養道厥

妖國有被髮於野祭者

又曰古尚書說非時祭天謂之類言以事類告也肆類于

上帝時舜告攝非常祭

又曰古周禮說大宗伯凡祀大神享大鬼祭大祗率執事

而下日大鬼謂先王也

漢書曰亳人繆忌奏祠太一方曰天神貴者太一太一佐



日五帝古者天子以春秋祭太一東南郊日一太牢具七日為壇開八通之鬼道於是天子令太祝立其祠長安城東南郊常奉祀如忌方其後人上書言古者天子三年一用太牢祠三一天一地一太一天子許之令太祝領祠之於忌太一壇上如其方後人復有上書言古者天子常以春解祠祠黃帝用一梟破鐘孟康曰梟鳥名也食母破鐘使百吏祠皆用之破鐘如龜而虎眼如淳曰漢使東郡冥送梟五月五日作梟羹以賜百官以其惡鳥故食之冥羊用羊祠服虔曰神名也馬行用一青牡馬太一罍山山君地長用牛武夷君用乾魚陰陽使者以一牛孟康曰陰陽之神也令祠官領之而祠於忌太一壇旁

又曰高祖為沛公祠黃帝祭蚩尤於沛庭而釁鼓旗幟皆赤

又曰高祖微時聞魏公子賢及即位每過大梁常祀公子

高祖十二年從擊黥布還為公子置守冢歲四時奉祀公子矣

又曰張子房從高帝過濟北果得穀城山下黃石取而葆祠之及留侯死并葬黃石上冢伏臘祠黃石留侯

又郊祀志曰文帝下詔曰有異物之神見于成紀無害於民歲以有年朕親郊祀上帝諸神禮官議無諱以朕勞有司禮官曰古者天子夏親祠上帝於郊故曰郊於是天子始幸雍郊見五帝以孟夏四日答禮焉

又曰宣帝八月飲酎行祠孝昭廟先驅旄頭劍挺墮墜首插泥中刃向乘輿車馬驚公孫賀筮之有兵謀不吉上還使有司侍祠是時霍氏外孫代郡太守任宣坐謀反誅宣子章為公車丞亡在渭城界中夜入廟居郎間執戟立廟門待上至欲為逆發覺伏誅故事帝夜入廟其後待明而

入自此始也

又曰北光父霸為關內侯食邑霸上書求奉孔子祭祀元帝下詔曰其令師襄成君關內侯霸以所食邑戶八百祀孔子焉故霸遣長子福數於魯奉夫子祠

又曰初朱邑且死屬其子曰我故為桐鄉嗇夫其吏民愛我必葬桐鄉後世子孫奉尚我不如桐鄉民及死其子葬之桐鄉西郭外民果共立祠歲時祠祭至今不絕

太平御覽卷第五百二十五

太平御覽卷第五百二十六

禮儀部五

禮祭下

漢書部祀志曰洪範八政三曰祀祀者所以昭孝事祖通

神明也旁及四夷莫不修之下至禽獸豺獮有祭應劭曰

春獮祭魚季秋豺祭獸是以聖王為之典禮焉秦襄公攻戎救周列

為諸侯而居西自以為主少昊之神作西時祠白帝其牲

用駟駒黃牛羝羊各一云其後十四年秦文公東獵汧渭

之閒卜居之而吉文公夢黃蛇自天下屬地其口止於鄜

衍李奇曰文公問於史淳淳曰此上帝之徵君其祠之於

是作鄜時用三牲郊祭白帝焉自未作鄜時而雍旁故有

吳陽武時李奇曰於旁雍東有好時皆廢無祀或曰自古

以雍州積高神明之隲故立時郊上帝諸神祠皆聚云蓋

太平御覽

黃帝時嘗用事鮮艸周亦郊焉其語不經見摺紳者弗道  
又曰始皇東遊海上行禮祠名山大川及八神求仙人羨  
門之屬八神將自古而有之或曰太公以來作之齊所以  
為齊以天齊也蘇林曰當天中央齊其祀絕莫知起時

又曰文帝始幸雍郊見五時祠衣皆上赤趙人新垣平以  
望氣見上言長安東北有神氣成五采若人冠冕焉或曰  
東北神明之舍西方神明之墓也張晏曰神明日也日出

西故天瑞下宜立祠上帝以合符應於是作渭陽五帝廟  
同宇韋昭曰宇謂上同下異帝一殿面五門各如其帝色  
祠所用及儀亦如雍五時明年夏四月文帝親拜霸渭之

會以郊見渭陽五帝五帝廟臨渭其北穿蒲池溝水燿火  
舉而祠若光輝然屬天焉於是貴平至上大夫賜累千金  
而使博士諸生刪六經中作王制謀議巡狩封禪事文帝

出長門若見五人於道北遂因其直立五帝壇孟康曰直

立壇以祠以五牢

東觀漢記曰建武三年上幸春陵祠園廟大置酒與春陵

父老故人為樂

又曰桓譚字君山沛人章帝元和中行巡狩至沛令使者

祠譚冢鄉里以為榮

又曰李通上大司空印綬以特進奉朝請及有司奏請封

諸皇子帝感通首創大謀即日封通少子雄為邵陵侯每

幸南陽常遣使者以太牢祀通父冢

又曰顯宗拜馬嚴持兵長史將北軍五校士羽林兵三千

人屯西河美稷衛護南單于聽置司馬從事牧守謁劾同

之將軍勅嚴過武庫祭蚩尤帝親御阿閣觀其士眾時人

榮之

又曰永平中詔京兆右扶風以中牢祠蕭何霍光出郡錢穀給蕭何子孫在三百里內悉令侍祠

又曰桓帝初立黃老祠北宮濯龍中以文罽爲壇飾淳金釵器采色眩曜祠用三牲太官設珎饌作倡樂以求福祥漢皇德傳云章帝詔使者奉太牢致祠唐堯於成陽雲臺表山松後漢書曰韓卓字子助陳留人臘日奴竊食祭其母卓義其心卽日免之

漢舊儀曰宗廟八月飲耐用九大牢元年祭天二年祭地三年祭五帝於五時三歲一辨皇帝自行他祠不出祭天紫壇幄帷高帝配天居室下西嚮紺幄席

又曰宗廟三年一大祫祭之子孫諸帝以昭穆坐於高廟諸殿廟神皆合食設左右坐高祖南面繡幄帳孽堂上西北隅曲几黃金釵器高后右坐亦幄帳却六寸每太牢中

之右辨上帝左辨上后俎餘委實積於前殿千斤名曰堆俎子爲昭孫爲穆昭西面曲屏風穆東面皆曲几如高祖饌陳其右各配其左坐如祖妣之座法

又曰原廟一歲十二祠有閏加皆用太牢  
又曰唯八月飲酎駕夕牲牛以繡衣之皇帝暮視牲以鑑燧取水於月以陽燧取火於日爲明水火左祖以水汲牛右肩手執鸞刀以切牛毛血薦之而卽更衣  
又曰五鳳元年儒術奏施行董仲舒請雨事始令丞相以下求雨雪曝城南舞童女禱天神五帝五年始令諸官止雨朱繩繫社擊鼓攻之

又曰祭五嶽祠用三正色牲十月涸凍二月解凍皆祭祝乘傳車稱使者祭四瀆用三正色牲沈珪白馬祭人先於隴西西縣人先山皆有土人山下有畦埒如種菜畦畦中

各王封祭參辰星辰於池陽谷日夾道左右爲壇營覆地  
各周三十六里  
又曰祭西王母於石室皆在所二千石令長奉祠漢五年  
修復周室舊祀祀后稷於東南常以八月祭一太牢舞者  
七十二人冠者五六三十人童子六七四十二人爲民祈  
農報功

又曰凡聖王之法追祭天地日月星辰山川萬神皆古之  
人也能紀天地五行氣奉其功以成人者也故其祭祀皆  
以人事之禮食之所食也非祭食天與土地金木水火石  
也又祭三皇五帝九皇六十四民皆古帝王凡八十一姓  
漢末英雄記曰公孫瓚爲郡上計吏郡太守劉基以事犯  
法檻車徵伯珪禱衣平幘御車到洛陽基當徙日南伯珪  
具豚米於墓上祭先人舉觴醊祝曰昔爲人子今爲人臣

當詣日南日南多瘴氣恐或不還與先人辭於此再拜慷  
慨而起其時州里人在京師者送行見之及觀者莫不歔  
歔

魏志曰管寧恒着布襦袴布裙隨時單複出入閭庭能自  
拄杖不須扶持四時祠祭輒自力強改加衣服着絮巾故  
在遼東所有白布單衣親薦饌跪拜成禮寧少喪母不識  
形像常特加觴泣然流涕

又曰穢南國常用十月祭祀晝夜飲酒歌儻名之爲舞天  
又祭虎以爲神

吳志曰赤烏年有兩烏銜鵲墮東館丞相朱據燎鵲以祭  
千寶晉紀曰帝配饗魏太祖廟有司奏諸功臣從饗者更  
以官爲次在荀郭之上

後魏書曰胡處少孤言及父母則若孺子之號燉煌汜潛

家善釀酒每節常送一壺以給祭事也

沈約宋書曰羊玄保自少至老謹於祭奠四時珍新未得祠薦者口不妄嘗

齊書曰張冲永明八年爲假節監青冀二州行刺史事冲父初卒遺命曰祭我必以鄉土所產無用牲物冲在鎮西時還吳國取果菜每至蒸嘗輒流涕薦焉

家語曰魯公索氏將祭而亡其下牲孔子聞之曰公索氏不及二年必亡矣一年而亡

孔叢子曰元和二年春帝東巡狩還過魯幸闕里以太牢祠孔子及七十二子作六代之樂大會孔氏男子二十已上者六十三人命儒者講論

尸子曰先王之祠禮也天子祭四極諸侯祭山川大夫祭五祀士祭其親也

白虎通曰王者祭宗廟親自取禽者尊重先祖必欲自射加功力

又曰玉制曰春薦韭夏薦麥秋薦黍冬薦稻韭以卵麥以魚黍以豚稻以鴈春日祠者物微故祠名之夏日杓者麥熟進之秋日嘗者新穀熟冬曰蒸蒸者爲衆冬之時物成者衆

益部耆舊傳曰蜀郡張寬字叔文漢武帝時爲侍中從祀甘泉至渭橋有女子浴於渭水乳長七尺上怪其異遣問之女曰帝後第七車知我所來時寬在第七車對曰天星主祭祀者齋戒不嚴則女人星見

汝南先賢傳曰薛苞歸先人家側坊中種稻以祭祀芋以充飢耽詩悅禮玄虛無爲舉孝廉賢良方正皆不就王歆之神境記曰九疑山旣出林過溪望見舜廟在羣山

之下而插搆水際杳若靈居矣余親負勁策致祠靈堂乃躬就齋潔奉奠其背水月如鏡隱澗微響乃聞廟裏若有絃歌者聲調如近察復緬邈此其五絃之音南風之響乎解道虎齊記曰臨淄城南十五里天齊淵五泉並出有異於常故廟屋以祠瓦有天齊字在齊八祠祠天於此故名云

越絕書曰越王既得平吳春祭三江秋祭五湖因以其時為之立祠垂之來世傳之萬載鄰邦樂德皆來取之吳越春秋曰夫差帥諸群臣出國東祠子胥江水濱諸臣並在夫差乃言曰寡人蒙先王之遺恩為千乘之主昔不聽相國之言乃用讒佞之辭至令相國遠沒江海自亡已來濛濛惑惑如霧蔽日莫誰與言泣下沾衿哀不自勝左右羣僚莫不悲傷

十二州記曰昔禹治洪水既畢乃乖橋車到鍾山祠上帝於北河歸大功于九河也襄陽記曰諸葛亮初亡所在各求為立廟朝議以不合百姓遂因時節私祭之於道陌也摯虞雜記議曰故事祀臯陶於廷尉寺祭先聖於大學也栢子新論曰昔楚靈王驕逸輕下簡賢務鬼信巫祝之道齋戒潔鮮以祀上帝禮羣神躬執羽絃起舞壇前吳人來攻其國人告急而靈王鼓舞自若顧應之曰寡人方祭上帝樂明神當蒙福祐焉不敢赴救而吳兵遂至俘獲其太子及后姬以下甚可傷論衡曰魯文公逆祀去者三人定公順祀叛者五人貫於俗者謂則禮為非曉禮者寡則知是者稀又曰凡祭祀之義有二一日報功二曰循先報功以勉力

循先以崇恩也

黃帝玄女兵法曰問六甲將及夫人姓名服色曰其將皆着赤幘小冠帶白綬絞夫人足皆各象其禽獸足凡欲治致神當於帛上書諸神名如法祭蔭齊事六日見形六十一日一祭合諸神祭之祭法脯長一尺廣三寸白茅爲藉編以青絲藉長二尺四寸廣六寸餅棗粟并脯置藉上杯皆黑中以丹沙九兩盛米囊九枚置北斗座上中爲九星六甲坐外四面十二座座前一椀受道者壇東北祭南向再拜祝

軍令曰金鼓幢麾隆衝皆以立秋日祠先時一日主者請祠其主者奉祠若出征有所尅獲還亦祠向敵祠血于鍾鼓秋祠及有所尅獲還但祠不血鍾鼓祝文某官使主者某敢告隆衝金鼓幢麾夫軍武之器者所以正不義爲民

除也謹以立秋之日潔牲黍稷旨酒而敬薦之

又日常以己丑日祠牛馬先祝文曰某月己丑某甲敢告馬牛先馬者用兵之道牛者軍農之用謹潔牲黍稷旨酒敬而薦之

又曰軍行濟河主者常先沈白璧文曰某王使者某甲敢告于河賤臣某甲作亂天子使某帥衆濟河征討醜類故以璧沈唯爾有神裁之

曹植求祭先王表曰臣雖比拜表自計遠邈已來以踰旬日垂音夏節方到臣悲感有念先王父以夏至日終是以家俗不以夏日祭至於先王自可以令辰告祠臣雖卑鄙實稟體於先王且臣雖貧窶蒙陛下厚賜足供太牢之具臣欲祭於先王北河之上羊猪牛臣自能辨否者臣縣自有先王喜饒臣前以表得徐州臧霸饒二百枚足自供事



太平御覽 卷五百二十六  
請水瓜五枚計先王崩來未能半歲臣實欲告敬且欲復盡哀博士鹿優韓蓋等以爲禮公子不得禩先君公子之子不得祖諸侯謂不得立其廟而祭之也禮又曰庶子不得祭宗詔曰得月二十八日表知侯推情欲祭先王於河上覽省上下悲傷感切將欲違禮以續侯敬恭之意會博士鹿優等奏禮如此故寫以下開國承家顧迫禮制惟侯存心與吾同之

殷允祭徐孺子文曰惟太元六年龍集荒洛冬十月哉生魄試守豫章太守殷君謹遣左右某甲奉清酌蘇合一籃單羞再拜奠故聘士豫章徐先生

周祗祭梁鴻文曰晉隆和四年十一月陳郡周穎文以蘊藻行潦祠梁先生

殷闡祭王東亭文曰公以少牢之奠敬薦東亭王侯之靈

蓋聞助鑿不塵精金能照

伯玉祭孫叔敖文曰謹以豐羞祭楚令尹孫君之靈眇眇千載悠悠舒荆理無不通事隔者形尚想清塵承風効誠謝惠連祭古冢文曰東府掘城北墜入一丈餘得古冢上無封域不用磚瓦以木爲槨中有二棺正方兩頭無和明器之屬材瓦銅漆有數十種刻木爲人長三尺可有二十餘載開見悉識是人形以物根撥之應手灰滅棺上有五銖錢百餘枚水中有甘蔗節及梅李核皆浮出而不甚爛壞銘志不存世代不可得而知之公命城者改埋於東崗祭以豚酒既不知其名字遠近故假爲之號曰冥冥君云爾

揚泉請辭曰古不墓祭葬於中原而廟在大門裏不敢外其親平明出葬日中反虞不敢一日使神無依也周衰禮

廢立寢於廟墓漢因而不改以先帝衣冠四時上盥水進菓實而禘祫祭祀皆於宗廟及其未因寢之在墓咸往祭焉蓋由京師三輔酋豪大姓力强財富婦女贍侈車兩相追宿止墓下連日厭飫遂以成俗迨乎今日夫死者骨肉歸乎土神而有靈豈其守夫敗壤而繫乎草莽哉  
唐書曰王義方初為太子校書魏徵張亮皆厚禮之亮誅坐與交遊貶授儋州吉安丞行至南海舟人將以酒脯致祭義方曰黍稷非馨義在明德乃酌水而祭

太平御覽卷第五百二十六

太平御覽卷第五百二十七

禮儀部六

郊丘

尚書召誥曰翼日乙卯周公朝至于洛則達觀於新邑營越三日丁巳用牲于郊牛一羊一豕一周書作雒日乃設兆于南郊祀以上帝配以后稷農星先王皆與食

毛詩清廟昊天有成命日昊天有成命郊祀天地也昊天有成命二后受之成王不敢康夙夜基命宥密昊天大命者言周自后稷之生而已有王命也

文王武王受其業施行道德成此王功  
周禮春官大宗伯日以禋祀祀昊天上帝禋之言煙煙者周人尚臭以實柴祀日月星辰星五緯也以禋燎祀司中司命風師雨師禋積也司中文昌

星也雨師畢星也鄭云司中

又曰蒼璧禮天禮天以冬至謂天皇大帝在北黃琮禮地

禮地以夏至謂神

又典瑞曰四珪有邸以祀天旅上帝鄭衆云於中央為璧

成故曰四珪有邸珪末四出故也或說四珪有邸有四角

也上帝玄天也鄭玄曰祀天夏正郊上天也上帝五帝所

郊亦猶五帝殊言兩珪有邸以祀地旅四望兩珪有象地

祀於北郊又春官下大司樂曰大司樂乃奏黃鍾歌大呂舞雲門以

祀天神天神謂五帝及日月星辰也王者各以夏奏太簇

歌應鍾舞咸池以祭地祇地祇所祭於北郊謂雷鼓雷鼗

孤竹之管雲和之琴瑟雲門之舞冬至日於地上之圓丘

奏之若樂六變則天神皆降可得而禮矣此禘大祭也

鼓靈鼗孤竹之管空桑之琴瑟咸池之舞夏至日于澤中

天神主北辰靈

之方丘奏之若樂八變則地祇皆出可得而禮矣地祇主

禮記禮運曰孔子曰魯之郊禘非禮也周公其衰矣杞之

郊也禹也宋之郊也契也是天子之事守也先祖法度子

故天子祭天地諸侯祭社稷視嘏莫敢易其常古是謂大

嘏嘏亦大也不敢改其常古之法度是謂之大也

又曰祭帝於郊所以定天位也祀社於國所以列地利也

又郊特牲曰郊之祭也迎長日之至也大報天而主日也

兆於南郊就陽位也掃地而祭於其質也器用陶匏以象

天地之性也於郊故謂之郊牲用騂尚赤也用犢貴誠也

尚赤者郊之用辛也自周之始郊日以言日以至周郊

周也陽氣新用事順之而用辛日三王之郊一用夏正魯以無

冬至祭天於圓丘之事是以建子月郊天示先有事也用

當齋戒自新耳卜郊受命于祖廟作龜於禘宮尊祖親

考之義也郊所以明天道也萬物本乎天人本乎祖此所

以配上帝也郊之祭也大報本反始也

又明堂位曰成王封周公於魯命魯公世世祀周公以天子之禮樂是以魯君孟春乘大輅載弧韜旂十有二旒日月之章祀帝于郊配以后稷天子之禮也

又大傳曰禮不王不禘王者禘其祖之所自出以其祖配

凡大祭曰禘自由也大祭其先祖所由生謂郊祭天王怒黃則含樞紐白則白招拒黑則汁光紀皆用正歲之正也宗祀文王於明堂以配上帝汎配五帝也

又祭法曰有虞氏禘黃帝而郊嚳祖顓頊而宗堯夏后氏亦禘黃帝而郊嚳祖顓頊而宗禹殷人禘嚳而郊冥祖契而宗湯周人亦禘嚳而郊稷祖文王而宗武王謂祭祀以配食也此禘謂祭昊天於圓丘

又祭儀曰郊之祭大報天而主日配以月夏后氏祭其間

又祭義曰郊之祭大報天而主日配以月夏后氏祭其間殷人祭其陽周人祭日以朝及闇祭日於壇祭月於坎以別幽明以制上下祭日於東祭月於西以別內外以端其位日出於東月牛於西陰陽長短終始相巡以致天下之和以達天下之禮致反始也致鬼神也致和用也致義也致讓也

禮含文嘉曰五祀南郊北郊西郊東郊中郊兆正謀東郊城入里南郊九里北郊六里中郊西南去城五里兆者作封畔兆域也正謀者方欲迎氣齋戒自端正謀慮其事也五者天子公侯伯子男卿大夫士所以承天也

禮記外傳曰王者冬至之日祭昊天上帝於圓丘冬至一人力所為謂之丘自諸侯不祭天之魯無圓丘之祭及二王然高大也天體圓郊王肅云天惟一帝鄭玄以天有六帝據周禮祀昊天星辰之位列于壇下也掃地而祭以下為貴燔牲玉於壇上

又曰夏至日祭皇地祇於方澤配以后土地體方也謂祭  
之二正祭歲有立冬之日祭神州地祇於北郊配以后稷  
制也神州即王者所居在崑崙東南五千里封域  
之內土地之口州此即吉土可以享帝於郊也  
左傳襄上曰三卜郊不從乃免牲孟獻子曰吾乃今而後  
知有卜筮夫郊祀后稷以祈農事郊祀后稷以配天后是  
故啓蟄而郊郊而後耕今既耕而後卜郊宜其不從也  
穀梁傳宣公曰郊牛之口傷之口緩辭也不言之危辭也  
角者兵之象故給養不傷自牛作也改卜牛死乃不郊  
謹敬鬼神不事故緩也  
春秋繁露曰王者歲一祭天於郊天者百神之君王者所  
最尊也  
又曰春秋之義國有大喪者止宗廟之祭而不止郊祭不  
止郊祭者不敢以父母之喪廢事天之禮也  
孝經曰昔者周公郊祀后稷以配天宗祀文王於廟堂以

配上帝也

五經異義曰春秋公羊說禮郊及日皆不下常以正月上  
丁也魯與天子並事變禮今成王命魯使卜從乃郊不從  
即已下天子也魯以上辛郊不敢與天子同也  
又曰今尚書夏侯歐陽說類祭天名也以事類祭之奈何  
天位在南方就南郊祭之是也  
五經通義曰王者所以祭天地何王者父事天母事地故  
以子道事之也祭日以丁與辛何丁者反覆自丁寧辛者  
當自尅辛也  
爾雅曰祭天曰燔柴祭地曰瘞埋  
廣雅曰圓丘太壇祭天也方澤太折祭地也  
漢書曰高祖入關問故秦時上帝祀何帝對曰四帝有白  
黃青赤之祀高祖曰吾聞天有五帝而四何也莫知其說

於是高祖曰吾知之矣待我而具五也乃立黑帝之祠名曰北時高祖入關問故秦祠上帝祠曰四帝祠又郊祀志曰遂郊雍至隴西登崆峒幸甘泉令祠官寬舒等具太一祠壇祠壇放亳忌太一壇壇三垓五帝壇環居其下各如其方黃帝西南除八通鬼道太一所用如雍五時物而加醴棗脯之屬殺一鰲牛以爲俎豆牢具禮記注疏又曰三年一郊秦以十月爲歲首故常以十月上宿郊見通權火張晏曰權火烽火也狀若井桔槔矣其法類稱故雍五十里一烽火拜於咸陽之旁而衣上白其用如經祠如淳曰權舉也云服虔曰又曰武帝立后土祠於汾陰立太一祠於甘泉祭日以牛祝宰衣赤祭月以羊祝宰衣白宣帝於聖成山祠日於芥山祭月

又曰成帝初卽位丞相衡御史大夫譚奏言祭天於南郊就陽之義也瘞地於北郊卽陰之象也因其所都而各饗焉昔者周公文武郊於鄠鎬成王郊于雒邑由此觀之天隨王者所居而饗之可見也甘泉秦時河東后土之祠宜可徙置長安續漢書祭祀志曰建武元年光武帝卽位于鄠爲壇營于鄠之陽祭告天地採用元始中郊祭事二年正月初制郊兆於雒陽城南七里依鄠採元始中故事爲圓壇八陛中又爲皇壇天地位其上皆南嚮又曰北郊在雒陽城北四里爲方壇四階二年初別祠地祇位南面西上高皇后配西面北上皆在壇上地理羣神從食皆在壇下東觀漢記曰上都雒陽制兆於城南七里北郊四里行夏

之時時以平旦服色犧牲尚黑明火德之運常服徽幟尚赤四時隨色季夏黃色議者曰昔周公郊祀后稷以配天宗祀文王以配上帝圖讖著伊堯赤帝之子俱與后稷並受命而爲王漢劉祖堯宜郊祀帝堯以配天宗祀高祖以配上帝有司奏議曰追跡先代無郊其五運之祖者故禹不郊白帝周不郊帝嚳漢雖唐之苗堯以歷數命舜高祖自感赤龍火德承運而起當以高祖配堯之後還復於漢宜修奉濟陽成陽縣堯冢雲臺致敬祭祀禮亦宜之  
又曰光武中元年起明堂璧雍靈臺及北郊  
謝承後漢書曰丹陽方儲聰明善天文爲洛陽令章帝欲出南郊儲上言當有疾雨暴風乘輿不可以出上疑其妄備飲醕而死果有大風暴雨洛中晝暝  
後漢書曰光武嘗問鄭興郊祀事曰吾欲以讖斷之何如

興對曰臣不爲讖帝怒曰卿之不爲讖非之邪興惶恐曰臣於書有所未學而無所非也帝意乃解  
漢舊儀曰漢制天地以下群臣所祭凡千五百四十新益爲萬五千四十漢法三歲一祭天於雲陽宮甘泉壇以冬至日祭天天神下三歲一祭地於河東汾陰后土宮以夏至日祭地地神出五帝祭於雍五時  
又曰祭天用六綵綺席六重長一丈中一幅四周緣之玉飾器凡器七千三百物備具養牛五歲至三千斤  
又曰皇帝祭天居雲陽宮齋白日上甘泉通天臺高三十丈以候天神之下見如流火舞女童三百人皆年八歲天神下壇所舉烽火皇帝就竹宮中不至壇所甘泉臺去長安三百里望見長安城黃帝以來所祭天之圓丘也  
又曰祭地河東汾陰后土宮宮曲入河古之祭地澤中方

丘也禮儀如祭天名曰汾葵一曰葵丘也

宋書禮志曰魏文帝黃初二年正月郊祀天地明堂是時魏都洛京而神祇兆域明堂靈臺皆因漢舊事四年帝將東巡以大軍當出使太常以一特牛告祠南郊自後以爲常

又曰太和元年正月郊祀武皇帝以配天宗祀文皇帝於明堂以配上帝是時二漢郊禋之制具存魏所損益可知也

又曰魏景初元年始營洛陽南委粟山爲圓丘詔曰昔漢氏之初承秦滅學之後採摭殘毀以備郊祀自甘泉后土雍宮五時神祇兆位多不經見並以興廢無常一彼一此四百餘年廢無禘禮古代之所更立者遂有闕焉曹氏世繫出自有虞氏今祀圓丘以始祖帝舜配祀方丘以舜妃

伊氏配大郊所祭曰皇天之神以太祖武皇帝配地郊所祭曰皇地之祇以武宣皇后配宗祀皇考高祖文皇帝於明堂以配上帝

江表傳曰群臣以孫權未郊祀奏議曰頃者嘉瑞屢臻遠國慕義宜備郊祀以承天意權曰郊祀當於中土今非其所於何施此重奏曰普天之下莫非王土王者以天下爲家周文武郊鄴鄙非必中土權曰武王伐紂卽作鄴京而郊其所也文王未爲天子立郊于鄴見何經典復奏曰伏見漢書郊祀志匡衡奏徙甘泉河東郊於長安言文王郊於鄴權曰文王德性謙讓處諸侯之位明未郊也經傳無明文匡衡俗儒臆說非典籍正義不可用

志林曰吳主糾駁郊祀之奏追貶匡衡謂之俗儒凡在見者莫不慨然以爲妙盡物理達於事宜至於稽之典籍乃



更不通毛氏之說云堯見天因郅而生后稷故國之於郅命使事天故詩曰后稷肇祀庶無罪悔以迄于今言自后稷以來皆得祭天猶魯人郊祀也是以棫樸之作有積燎之薪文王郊豐經有文臣衡豈俗而誑之哉文王雖未爲天子然三分天下有二伐崇龜黎祖伊奔告天既奔躬乃眷西顧太伯三讓以有天下文王爲王於義何疑然則匡衡之奏有所未盡案世宗立甘泉汾陽之祠皆出方士之言非據經典者也方士以甘泉汾陽黃帝祭天地之處故孝武因之遂立二時漢治長安而甘泉在北謂就乾位而衡云武帝居甘泉祭於南宮此既誤矣祭地汾陽在水之間呼爲澤中而衡云東之少陽失其本意矣

晉起居注曰武帝太始元年十二月太常諸葛緒上言國士祭酒劉喜等議帝王各尊其祖所自出大晉禮天郊以

宣皇帝配地郊以宣皇后配明堂以景皇帝文皇帝配博士孔晁議禮王者郊天以其祖配周公以后稷配天於南郊以文王配五精上帝於明堂經典無配地文魏以先妃配不合禮制周配祭不及武王禮制有斷今晉郊天宜以宣皇帝配明堂宜以文皇帝配有司奏大晉初建庶事未定且如魏詔郊祀大事速議爲定

晉書禮志曰晉太始二年詔羣臣議五帝卽天也王氣時異故殊其號雖名有五其實一神明堂南郊宜除五帝之坐五郊改五精之號皆同稱昊天上帝各設一坐而已又曰康帝建元元年正月將北郊有疑議太常顧和表北郊之月古無明文漢光武正月辛未始建北郊則與南郊同月咸和中北郊同共正月周禮三王之郊一用夏正於是從和議是月辛未南郊辛巳北郊帝皆親奉

宋書禮志曰晉孝武帝詔曰郊祀國之大事而稽古之制  
闕然便可詳議祠部郎徐邈議圓丘郊祀經典無二宣皇  
帝嘗辨斯義而檢以聖典爰及中興備加研極以定南北  
二郊誠非異學所可輕改也謂仍舊爲安  
晉起居注曰明帝大寧三年上親祀七月又詔自中興以  
來雖南郊未嘗北郊五岳四瀆名山大川應望秩者廢而  
未舉居其官者舉其職司其事勿令一代之典闕而不備  
主者詳依舊處  
又曰安帝元興三年十二月明年應郊乘輿未反博訪內  
外左丞王納之議曰議者謂應郊故承制中事納之謂大  
饗大祀大樂皆是承制不可得命三公行者郊天極尊唯  
一而已故非天子不祀也又按武皇受禪用二月郊元帝  
中興亦以二月今郊時未過日望鑾駕無爲欲速而據皇

輿旋反更不得親奉不如緩而盡美於是異同難明遂從  
納之議

宋書禮志曰晉太始二年十一月有司又議古者丘郊不  
異宜并圓丘方丘於南北郊更修治壇兆其二至之祀合  
於二郊帝又從之一如宣帝所用王肅議也是月庚寅冬  
至帝親祀圓丘於南郊自是後圓丘方澤不別立  
又曰孫權始都武昌及建業不立郊兆至末年太元元年  
十一月祭南郊其地今秣陵縣南十餘里郊中是也晉氏  
南遷立南郊於巳地非禮所謂陽位之義也宋武大明三  
年尚書右丞徐爰議郊祀之位遠古蔑聞禮記燔柴於太  
一祭天也兆於南郊就陽位也漢初甘泉河東禋埋易位  
終亦徙於長安南兆光武紹祚定二郊洛陽南北晉氏過  
江悉在北及郊兆之議紛然不一又南出道狹未議開闢

遂於東南已地創立丘壇皇宋受命因而弗改且居民之中非邑外之謂今聖圖重造舊章畢新南驛開塗陽路脩遠謂宜郊正午以定天位博士司馬興之傅郁太常丞陸澄並同爰議乃移郊兆於秣陵牛頭山西正在宮之午地也

傅玄正都賦曰建乎禋祀祈福上帝天子乃反古服襲大裘緹組五采平冕垂旒質文斌斌帝容孔脩列大駕於郊畛升八通之靈壇執鎗珪而進蒼璧思致美乎上乾爾乃太簇爲徵圓鍾爲宮吹孤竹而拊雲和脩軒轅之遺風類於圓丘六變既終則天神斯降可得而禮矣


司馬相如封禪書曰濯濯之麟遊彼靈時孟冬十月君徂郊祀馳我君車帝以享祉

郭璞上疏曰臣歲首粗有所占得解之既濟按解卦繇云

君子以赦過宥罪既濟云思患而預防之郊祀者以通天人之誠感因農祥而祈事上乃致敬於皇靈下以播惠於萌黎者也臣愚以爲於卦之義既郊之後宜發哀矜之詔引在予之責蕩除瑕釁贊陽布惠使幽弊之民應養生以悅育否滯之氣隨谷風而舒散此亦寄時事以制用藉開塞而曲成者也

太平御覽卷第五百二十七

太平御覽卷第五百二十八



太平御覽卷第五百二十八

禮儀部七

迎氣

禘祫

六宗

迎氣

禮記月令曰孟春立春之日天子親率三公九卿大夫迎  
 春於東郊蔡邕章句曰迎春者禮昊天句芒之神也於東  
 周禮建國之神位也邑外為郊去邑八里內因木數也  
 禮南方以白琥禮西方以玄黃禮北方以蒼珪禮東方以赤璋  
 方之禮雲翹育命所以導收時和也孟夏迎夏於南郊章句  
 戚舞者禮炎帝祝融之神也於南郊七里因火數也孟春也  
 璋者禮炎帝祝融之神也於南郊七里因火數也孟春也  
 孟秋迎秋於西郊章句曰迎秋者禮朱明其數也玉用自琥  
 放其色樂奏夷則歌白孟冬迎冬於北郊章句曰迎冬者  
 藏其色樂奏黃鍾歌玄英其數也玉用玄牲幣各放  
 其色樂於北郊六里因水數也玉用玄牲幣各放  
 續漢書禮儀志曰立春之日百官皆衣青迎氣青郊郡縣

太平御覽卷第五百二十八

皆青服幘立青幡施土牛耕人於門外以示兆民立夏之日百官皆衣赤迎氣赤郊立秋之日百官皆衣白迎氣白郊立冬之日百官皆衣皂迎氣黑郊又祭祀志曰縣邑常以立春之日皆青幘青幘迎春於郭外令一童男冒青巾衣青衣先在郭外迎春者至自野中出迎者拜之而還皇覽曰禮天子迎四節日天子迎春夏秋冬之樂又順天道是故距冬至日四十六日則天子迎春於東堂距邦八里堂高八尺堂階八等青稅八乘旂旒尚青田車載矛號曰助天生倡之以角舞之以羽翟此迎春之樂也自春分數四十六日則天子迎夏於南堂距邦七里堂高七尺堂階七等赤稅七乘旂旒尚赤田車載弓號曰助天養倡之以徵舞之以鼓鞀此迎夏之樂也自夏至數四十六日則

天子迎秋於西堂距邦九里堂高九尺堂階九等白稅九乘旂旒尚白田車載戟號曰助天收倡之以商舞之以干戚此迎秋之樂也自秋分數四十六日則天子迎冬於北堂距邦六里堂高六尺堂階六等黑稅六乘旂旒尚黑田車載甲號曰助天誅倡之以羽舞之以干戈此迎冬之樂也所以迎四時樂養九志於西堂冬養九勝於北堂養後三日而止天子行殺必順天道宋書禮志曰漢明帝據月令有五郊迎氣服色之禮因採元始中故事兆五郊于洛陽祭其帝與神車服各順方色魏晉依之江左以來未遑脩建禘祫毛詩清廟維禘祫維辟公天子穆穆禘祫有來雍雍至止肅肅相

又商頌曰長發大禘也大禘郊祭天也禮記曰王者禘其祖之所自出以其祖配之是謂也濬哲維商長發其祥洪水芒芒禹敷下土方外大國是疆幅隕既長箋云長猶久也隕當作圓謂周也深知乎維下土正四方定諸夏廣大其竟界之時始有王天下之萌兆歷虞夏之世故為久也

禮記曾子問曰當七廟五廟無虛主虛主唯天子崩諸侯薨與去其國與禘祭於太祖為無主耳

又大傳曰禮不王不禘王者禘其祖之所自出以其祖配

之凡大祭曰禘自由也大祭其先祖所由生謂郊祭天也王之者之先祖皆感太微五帝之精以生皆用正月郊祭

之蓋特尊焉孝經曰郊祀后稷以配天宗祀文王於明堂以配上帝況配五帝也

周禮宗伯職曰以肆獻裸享先王以饋食享先王以祠春

享先王以禴夏享先王以嘗秋享先王以烝冬享先王廟

之祭有此六享肆獻裸饋食在四時之上則是禘也禘也

禮稽命曜曰三年一禘五年一禘以衣服想見其容色三

日齊思親志意想見所好意喜然後入廟

左傳昭四曰十五年春將禘于武公戒百官杜預注曰梓戒齊也

慎日禘之日其有咎乎吾見赤黑之禋非祭祥也喪氛也

禋也其在禋事乎

公羊傳文上曰禘者何也合祭也其合祭奈何毀廟之主

陳乎太祖未毀廟之主皆升合食於太祖

爾雅曰禘大祭也郭璞曰五年大祭

白虎通曰祭宗廟所以禘禘何尊人君貴功德廣孝道位

尊德盛所及彌遠

五經異義曰今春秋公羊說祠宗廟筮而不卜傳曰禘禘

不卜

又曰謹案叔孫通宗廟有月祭之禮知古而然也三歲一

禘此周禮也五歲一禘疑先王之禮也

禮記



禘祫

王隱晉書曰太康中太廟成遷神主於新廟上帥百官奉迎於道左遂親禘祫

後魏書曰世宗景明二年夏六月祕書丞孫思蔚上言古之祭法時祫並行天子先祫後時諸侯先時後祫此施當世在今則煩且禮有升降事有節文適時之制聖人弗違當祫之月減時祭以從要省制可十一月壬寅改築圓丘於伊水之陽乙卯仍有事焉

宋書禮志曰凡禘祫大祭則神主悉出廟堂爲昭穆以安坐不復停室也

又曰博士徐道娛上議曰太廟烝嘗儀注皇帝行事畢出便坐三公已上獻太祝逆神于門然後至尊還拜百官贊拜乃退謹尋清廟之道所以肅安神也禮曰廟者貌也神

靈所憑依也事亡如存若恒在也既不應有送神之文自陳豆薦俎車駕至止並弗奉迎夫不迎而送送而後辭闕短之情實用未達博士江邃議在始不迎明在廟也卒事而送節孝思也若不送而辭是舍親也辭而後送是違神也故孝子不忍違其親又不忍遣神是以祝史送神以成烝嘗之義

又曰禘祫之禮三年一五年再公羊所謂五年再殷祭也在四時之間周禮所謂凡四時之間禮也蓋歷歲節月無定天子諸侯先後弗同禮稱天子祫嘗諸侯烝祫有田則祭無田則薦鄭注天子先祫然後時祭諸侯先時祭然後祫有田者既祭又薦新祭以首時薦以仲月然則大祭四祀其月各異天子以孟月殷仲月蒸諸侯孟月嘗仲月祫也



齊書禮志曰右僕射王儉議按禮記王制天子先禘後時祭諸侯先時祭後禘春秋魯僖二年禘明年春禘自此以後五年再殷

禮緯稽命徵曰三年一禘五年一禘經記所論禘禘與時祭其言詳矣

唐書曰元和中太常上言按禮祭不欲數太廟禘禘祭禮重於時饗時饗與禘禘同月即其月但行禘禘祭不行時饗蓋不欲煩是禮先重者今時饗重於朔望薦食稽求禮情參酌輕重請每至時及臘但行饗禮其月朔望薦食請停如告廟日與朔望薦食日同請先行告禮然後薦食

### 六宗

尚書舜典曰禋于六宗鄭注曰六宗謂星辰司中司命風伯雨師也尚書大傳曰萬物非天不生非地不載非春不動非夏不

長非秋不收非冬不藏故書曰禋于六宗此之謂也

五經異義曰今尚書歐陽夏侯說六宗者上不及天下不及地旁不及四方居中央恍惚無有神助陰陽變化有益於人郊天并祭之

又曰古尚書說六宗者天地屬神之尊者謂天宗三地宗三天宗日月北辰也地宗岱山河海也日月為陰陽宗北辰為星宗岱為山宗河為水宗海為澤宗也祀天則天文從祀地則地理從也

續漢書祭祀志曰安帝以尚書歐陽家說云六宗者在天地四方之中為上下四方之宗以元始故事謂六宗亦六子之氣日月雷風山澤者為非三月更立六宗祠於洛陽城西北地禮比太社

東觀漢記曰光武即帝位燔燎告天禋于六宗李邵別傳

日郤侍祠南郊不見六宗祠奏曰按尚書肆類於上帝禋于六宗漢興於甘泉汾陽祭天地亦禋六宗至孝成時匡衡奏立北郊復祠六宗至建武都洛陽制郊祀不道祭六宗由是廢不血食今宜復舊上從公議由是遂祭六宗張純六宗表曰臣竊以十一家凡有六統而所據各異考之經禮大義不通臣謂禋于六宗祀祖考所尊者六宗則三昭三穆也魏書曰明帝問王肅六宗音幾對曰坎為水離為火震為雷巽為風艮為山兌為澤此乾坤六甲子也

太平御覽卷第五百二十八

太平御覽卷第五百二十九

禮儀部八

五祀

五祀

四望

高禩

禱祈

禮記祭法曰王為群姓立七祀曰司命日中霤日國門日國行日太厲日戶日竈諸侯為國立五祀曰司命日中霤日國門日國行日公厲大夫立三祀曰族厲日門日行適士立二祀日門日行庶人立一祀或立戶或立竈鄭玄注門行戶竈中霤也此皆小神居人之閒司察小過也又月令曰孟春其祀戶孟夏其祀竈季夏其祀中霤孟秋其祀門孟冬其祀行餘具吉禮門白虎通曰何謂五祀者門戶竈井中霤也又曰曲禮下記云天子祭天地四方山川五祀歲遍諸侯

方伯祀山川祭五祀歲遍士祭其先凡祀有廢之莫敢舉  
也有舉之莫敢廢也非所當祭而祭之名爲淫祀淫祀無  
福祭五祀所以歲遍何慎五行也

五經異義曰大戴說禮器云竈者老婦之祭許君按月令  
孟夏之月其祀竈五祀之神王者所祭非老婦也鄭玄曰  
竈神祝融是老婦

又曰王爲群姓立七祀一曰司命主督察人命也二曰中  
霤主宮室居處也三曰門四曰戶主出入五曰國行主道  
路也六曰大厲主殺也七曰竈主飲食也

漢舊儀曰祠五祀謂五行金木水火土也木正日勾芒火  
正日祝融金正日蓐收水正日玄冥土正日后土皆古賢  
能治成五行有功者也主其神祀之

魏名臣奏曰秦靜議云祭法七祀有國行今月令謂行爲

井是以俗廢行而祀井武帝始定天下興復舊祀造祭祀  
門戶井竈中霤文帝稱詔靜按凡諸祠祀所以尊敬神靈  
不宜稱詔高堂隆議曰國中霤門井竈多不遍唯祀在者  
故曰祭五祀在於廟今每門戶輒祭之自漢以來非舊典  
也祭井自漢從水類不列五祀宜除井祀行

世本日勸作湯五祀 謂時儻索室驅疫逐强死鬼也五祀  
謂門戶及井 竈中霤也

傳玄五祀議曰禮大記云室中央中霤謂四霤之中也祭  
於漏井蓋失之矣七祀之文皆云祀行而無井祭竈而不  
祭井於事則闕夫設祀者非唯報功而已亦神道設教使  
民慎之幽冥也臣以爲帝之都城宜祭一門正宮一門正  
室一戶井竈中霤亦各擇其一正者祭之

四望

尚書舜典曰正月上日受終于文祖在璿璣玉衡以齊七  
政肆類于上帝禋于六宗望於山川遍于群神歲二月東  
巡狩至于岱宗柴望秩于山川肆覲東后孔安國曰望秩  
于山川者以尊

早祭之也五岳視三公四瀆視諸  
侯其餘小者或卿大夫伯子男  
周禮春官土曰大宗伯之職國有大故則旅上帝及四望

四望五嶽四  
瀆四瀆也  
又春官曰小宗伯之職掌兆五帝於四郊四望四類亦如

之非為壇  
之管城  
又春官上曰典瑞掌玉瑞玉器之藏四珪有郊以祀天旅

上帝兩珪有郊以祀地旅四望  
又春官下大司樂曰春奏姑洗歌南呂舞大韶以禮四望

公羊傳僖下曰夏四月卜郊不從乃免牲猶三望三望者  
何望祭也則曷為祭祭泰山河海山川有能興雲致雨潤

于百里者天子秩而祭之此皆助天氣成  
功故祭天及之

五經通義曰王者所以因郊祭日月星辰風伯雨師山川  
何以為皆有功於民故祭之也皆天地之別神從官也緣

天地之意亦欲及之故歲一祭之禮日於南門外禮月四  
瀆於北門外禮山川丘陵於西門外祭風伯雨師於東門

外各即其位也以是明之其祭之柰何乎曰祭日者懸祭  
月者毀祭風者明祭雨者布疏祭山川者沉各象其貌也

三輔黃圖曰宰衡王莽奏曰冬至使有司祭天神於南郊  
高祖配而望群陽夏至使有司祭地祇於北郊高后配而

望群陰  
隋書志曰梁朱异議鄭眾云四望謂日月星海鄭玄云謂

五岳四瀆四瀆尋二鄭之說乎有不同竊以望是不即之  
名凡厥遙祭皆有斯目豈容局於星海拘於海瀆請令司

天有關水旱之義爰有四海名山大川能興雲致雨一皆備祭

高禘

禮記月令曰仲春玄鳥至之日以太牢祀于高禘天子親往后妃率九嬪御乃醴天子所御帶以弓鞬授以弓矢立於高禘之前蔡邕章句曰高禘祀名也高猶尊也禘者所接御者鞬弓衣也祝以高禘之命飲以醴酒帶以弓衣尚使御男者也鄭玄注曰玄鳥遺卵娥簡狄吞之生契後以爲媒官嘉祥而立祀也

漢書曰太子據立爲皇太子初上年二十九乃得太子甚

喜爲立禱張晏曰禱使東方朔枚舉作禱祝

續漢書曰仲春之月立高禘祀於城南禮以特性

五經異義曰王者一歲七祭天地仲春后妃郊禘禘亦祭天也

五經要義曰契母簡狄以玄鳥至之日祀於高禘而生契

高禘者蓋先王所以祈子孫之祀也玄鳥感陽而至集人

棟宇有孳乳之祥故重其至日因以用事

五經異義曰禮記曰玄鳥至之日以太牢祀于高禘注曰

高辛氏世娥簡狄吞鸞子而生契後王以爲禘官嘉祥立

其祀焉王權問日以注言之先商之時未有高禘生民詩

曰克禋克祀以祓無干傳以爲古者必以郊禘焉姜嫄禋

祀上帝而生稷是則郊禘之祀非以生契之後立也譙喬

答曰先商之時自有禘氏被除之祀位在南郊蓋亦以

玄鳥至之日然其所禘乃於上帝娥簡狄吞乙子之後後

王以爲禘官嘉祥祀之以配帝謂之高禘

晉束皙高禘壇石議曰元康六年高禘壇上石破爲二段

詔書問置此石來幾時出何經典今應復不博士議禮無

高禘置石之文未知造設所由既已毀破無可改造設高辛氏有簡狄吞卵之祥今世石有吞卵之象蓋俗說所爲而史籍無記可但收聚復於舊處而已太常以爲吞卵之言蓋是逸俗之失義因今毀破便宜廢除下四府博士議賊曹屬東督議夫未詳其置之故而欲必其可除之理理不可然按郊祀志秦漢不祀高禘漢武帝五子傳武帝晚得太子始爲立禘其事未之能審許慎五經異義云山陽民祭皆以石爲主然則石之爲主由來尙矣此其象矣而祭禮龜策祭器弊則埋之而改置新石今破則宜埋而更造不宜遂廢收集破石積之故處於禮無依於事不肅思所未安也時公卿從太常所處此議不用其後得高堂隆故事魏青龍中造立此禮詔書更鑄石令如舊置高禘壇上埋破石入地一丈

隋書禮志曰梁太廟北門內道西有石文如竹葉小屋覆之宋元嘉中脩廟所得陸澄以爲孝武時郊禘之石然則江左亦有此禮矣後齊高禘爲壇於南郊傍廣輪二十六尺高九尺四陛三壇

禱祈

周書曰四月孟夏王初祈禱于宗乃嘗麥于廟

毛詩甫田曰琴瑟擊鼓以御田祖以祈甘雨以介我稷黍以穀我士女

又生民行葦曰曾孫唯主酒醴維醕酌以大斗以祈黃耆

又臣工噫嘻曰春夏祈穀於上帝也祈猶禱求

周禮春官上小宗伯曰小宗伯掌大災乃執事禱祠于上下神祇

又春官下曰太祝掌六祝之辭以事鬼神祇祈福祥求永

貞馬融傳曰神天神鬼人鬼祇地祇也

禮記月令曰孟春是月也天子乃以元日祈穀于上帝

左傳襄上曰郊祀后稷以祈農事也

又定上曰魯昭公出故季平子禱于煬公九月立煬宮平逐君懼而請禱於煬公昭公死於外自以為獲福故立其宮

又哀上曰衛太子禱曰曾孫蒯瞶敢昭告皇祖文王周文大烈祖康叔文祖襄公鄭勝亂從助臣為從於亂晉午

在難午晉定不能治亂使鞅討之鞅趙簡子各

論語八佾曰王孫賈問曰與其媚於奧寧媚於竈何謂也

又述而日子疾病子路請禱禱謝過於鬼神子曰有諸觀子路曉禱禮否子路對曰有之誅曰禱爾于上下神祇誅天神之辭也子曰丘之

禱人矣孔子自知無過謝

五經異義曰禮祭法云天子有祧遠廟曰祧將祧而去之故曰祧去祧曰壇去壇曰墀皆藏於祖廟有事則禱無事則止

說文曰告事求福為禱

漢書曰文帝曰昔先王遠施不求其報望祀不祈其福今吾聞祠官祝釐如淳曰皆歸福於朕躬不為百姓夫以朕之不德而專饗獨美其福百姓不與是重吾不德也其令祠官致祀無有所祈

東觀漢記曰鄧太后嘗體不安左右憂惶至令禱祠願以人為代太后聞之即譴怒勅掖庭令以下何故乃有此不祥之言左右咸流涕歎太后臨大病不自願而念兆民後病瘳豈非天地之應與

晉中興書曰大旱經久太興四年四月始雨有司奏應報  
賽宗廟山川中宗詔曰祈廟云報賽非奉尊上辭也吾意  
有疑以爲舊山川有許報故雨賽非大事不應告廟臣子  
無要君之道黷祭稱賽於禮有違

唐書曰憲宗謂宰臣曰禳災祈福之說其事信否李藩對  
曰臣竊觀自古聖達皆不禱祠故楚昭王有疾卜者謂河  
爲崇昭王以河不在楚非所獲罪孔子以爲知天道仲尼  
疾病門人子路請禱仲尼以爲神道助順繫於所行己既  
全德無愧屋漏故吝子路云丘之禱久矣書云惠迪吉從  
逆凶言順道則吉從逆則凶詩云自求多福則禍福之來  
感應行事若苟爲非道則何福可求是以漢文帝每有祭  
祀使有司敬而不祈其見超然可謂盛德若使神明無知  
則安能降福必其有知則私己求媚之事君子尚不可悅

也況於明神乎由此言之則履信思順自天祐之苟異於  
此實難致福故堯舜之務唯在脩己以安百姓管仲云義  
於人者和於神蓋以人爲神主故但務安人而已號公求  
神以致危亡王莽妄祈以速漢兵古今明誠書傳所紀聖  
陛下每以漢文孔子之意爲準則百福具臻矣上深嘉美  
之  
又曰文宗開成中以久旱分命郡官徧祠祈禱於紫宸殿  
對宰臣憂形於色宰臣以星官所奏天時當爾乞不過勞  
聖慮上懷然改容曰朕爲天下主無德及人致此災旱今  
又謫見于上若三日不雨當退歸南位更選賢明以主天  
下宰臣嗚咽流涕各請罪乞免相位是夜澍雨大洽  
又曰孔戣爲廣州刺史先是准詔禱南海神多令從事代  
戣必自越風波而往韓愈爲潮州作詩美之



華陽國志曰梁輔爲郡五官時天大旱請雨不降輔出禱  
乃積薪祝神曰二日不雨則欲自焚謝罪百姓言終而雨  
長沙耆舊傳曰祝良爲洛陽令時亢旱天子祈雨不得良  
乃曝身階庭告誡引罪自晨至日中紫雲沓起甘雨登降  
民爲之歌曰天以不雨烝民失所天王自出祝令特苦精  
符感應滂沱而下

列仙傳曰歷陽有彭祖仙室前世云禱請風雨莫不輒應  
常有兩虎在祠左右今日祠訖即有虎迹

異苑曰晉簡文旣廢世子道生次子郁又早卒而未有息  
嗣濮陽令在弟前禱至三更鬱有黃氣自西南來逆室前  
爾夜幸李太后而生孝武皇帝

韓子曰衛人有夫妻禱者而祝曰使我無故得百束布其  
夫曰何少也對曰益是子將以買妾

呂氏春秋曰昔殷湯剋夏而天下大旱五年不收湯乃以  
身禱於桑林曰余一人有罪無及萬方萬方有罪在予一  
人無以一人之不敏使上帝鬼神傷民之命於是剪其髮  
麗其手自以爲牲用祈福於上帝民悅雨乃大至  
淮南子曰聖人者不恥身之賤而愧道之不行不憂命之  
短而憂百姓之窮也是故禹爲水以身解於陽肝之河湯  
爲早以身禱於桑林之下聖人之憂民如此其明也

太平御覽卷第五百三十一  
禮儀部九  
齋戒  
儼

太平御覽卷第五百三十

禮儀部九

齋戒

儼

齋戒

易上繫曰明於天之道而察於民之欲故典神物以前民

用聖人以此齋戒洗心曰齋防

周禮天官冢宰曰祀五帝則掌百官之誓戒與其具脩祀

帝謂四郊及明堂誓戒要之以刑重失禮也明堂位所謂

各揚其職百官廢職服大刑是其辭之略也其所當共修

掃除前期十日帥執事而卜日遂戒前朔前所誦之日也

齋三日執事宗伯大卜之

屬既卜又戒百官以始齋

禮記曲禮曰齋者不樂不吊為哀樂則失

又檀弓曰是故君子非有大故不宿於外大故謂非致齋

也非疾也不晝夜居於內內正寢

又王制曰天子齋戒受諫歲終群臣奉歲事司會以歲之

成質於天子司會冢宰之屬掌計要者成冢宰齋戒受質

受質大樂止大司寇市三官以其成從質於天子大樂正

伯之屬從從於司會也大司徒大司馬大司空齋戒受

質百官各以其成質於三官大司徒大司馬大司空以百

官之成質於天子百官此三百官齋戒受質受平

又郊特牲曰孔子曰三日齋一日用之猶恐不敬二日伐

鼓何居居讀為姬語之助何居怪之也伐猶擊也

又曰齋之玄也以陰幽思也故君子三日齋必見其所祭

者齋三日者思其居處思其笑語

又玉藻曰將適公所宿齋戒居外寢

又祭義曰古者天子諸侯必有養獸之官及歲時齋戒沐

浴而躬朝之犧牲祭牲必於是取之敬之至也

又曰致齋於內散齋於外齋之日思其居處思其笑語思

其志意思其所樂思其所嗜齋三日乃見其所為齋者

又祭統曰及時將祭君子乃齋齋之為言齊也齊不齊以

致齋者也是故君子非有大事也非有恭敬也則不齋不

齋則於物無防也嗜欲無止也及其將齋也防其邪物訖

其嗜欲耳不聽樂故記曰齋者不樂言不敢散其志也心

不苟慮必依於道手足不苟動必依於禮是故君子之齋

也專致其精明之德也故散齋七日以定之致齋三日以

齊之定之之謂齋齋者精明之至也然後可以交於神明

也定者定是故先期旬有一日官宰宿夫人夫人亦散齋

七日致齋三日官宰守官官也宿讀為君致齋於外夫人

致齋於內然後會於大廟

又坊記曰子云七日戒三日齋承一人焉以為尸過之者

趨走以教敬也戒謂散齋也承猶事也

又表記日子曰齋戒以事鬼神擇日月以見君恐民之不敬也

禮記外傳曰凡大小祭祀必先齋敬事天神人鬼也齋者

敬也齋其心思其貌然後可以入廟齋必變食去其葷羶

也居必遷坐易其常處也故散齋於外致齋於內外者公

者寢中大祀散齋七日祭日猶遠致齋三日致者至也

十日齋矣祭前旬外之日則有司戒告內外內外百官齋

謂之夙戒夙早中祀七日則散齋小祀三日月令秦書也

大小祭祀唯三日散齋二日致齋一月春秋合誠圖曰黃帝請問太一長生之道太一曰齋戒六

丁道乃可成丁取能丁寧

家語曰季桓子將祭齋三日而二日鍾鼓之音不絕再有

問於孔子子曰孝子之祭也散齋七日慎思其事致齋三

日一而用之精一而用之也猶恐不敬而二日伐鼓何居焉

論語述而曰子之所慎齋戰疾此三者人所不能

又鄉黨曰齋必有明衣布明衣親身衣所以自潔齋必變

食居必遷坐

史記曰蘭相如謂秦王曰趙王送璧時齋五日今大玉亦

宜齋遂許齋五日舍相如廣成傳舍秦王齋五日後乃設

九賓於庭引相如

又曰秦二世夢白虎囓其左驂馬殺之心不樂問占夢人

曰涇水為祟二世乃齋望夷宮闔樂殺之更立子嬰為王

漢書曰蕭何薦韓信於漢王何曰王宜擇日齋戒設壇場

具禮乃可王許之諸將皆喜人人各自以為得拜為大將

軍至拜乃韓信也一軍大驚也

又曰宣帝詔曰迺者鳳凰甘露降集京師嘉瑞竝見脩興  
太一五帝后土之祠祈爲百姓蒙福鸞鳳萬舞集止于旁  
齋戒之暮神光顯著薦鬯之夕神光交映或降于天或登  
于地或從四方來集于壇上帝嘉饗海內承福  
續漢書曰殤帝崩太后與兄車騎將軍鄧騭定策禁中其  
夜使騭持節以王青蓋車迎安帝齋于殿中

范曄後漢書曰周澤字稚都爲太常嘗卧疾齋宮其妻哀  
澤老病就問所苦澤大怒以妻干犯齋禁遂收送謝罪當  
世疑其詭譎時人語曰生世不諧作太常妻一歲三百六  
十日三百五十九日齋一日不齋醉如泥  
干寶晉紀曰劉毅爲司隸校尉嘗齋而疾其妻出看之表  
解齋  
唐書曰貞元九年冬德宗以是歲有年蠻夷朝貢思親告

郊廟於祀事尤重慎及將散齋謂宰臣曰在禮散齋歸正  
寢攝心奉祭不可聞外事其常務勿奏乃齋於別殿及命  
皇太子諸王行祭者皆受誓一日  
又曰貞元中德宗方有事於郊廟詔以皇太子爲亞獻親  
王爲終獻上令問柳冕當受誓戒否冕奏准開元禮並以  
前七日受誓戒詞云各揚其職不供其事國有常刑冕以  
誓皇太子更其詞云各揚其職肅奉常儀  
又曰憲宗元和中南郊陰氣凝閉浹旬不開宰臣議請改  
日上曰郊廟事重吾齋戒有日豈可廢乎至享獻之際景  
物澄清人情大悅  
鬼谷子曰周有豪士居鬼谷號爲鬼谷先生蘇秦張儀往  
見之先生曰吾將爲二子陳言至道子其齋戒擇日而學  
後秦儀齋戒而往

莊子曰顏回曰吾無以進矣敢問其方仲尼曰齋吾將語若顏回曰回之家貧唯不飲酒不茹葷者數月矣若此則不可以為齋乎曰是祭祀之齋非心齋也回曰敢問心齋仲尼曰若一志無聽之以耳而聽之以心無聽之以心而聽之以氣唯道集虛虛者心齋也

又曰梓慶削大木為鑿鑿成見者驚猶鬼神魯侯曰子一何巧矣何術以至此曰臣工人何術之有雖然有一焉臣為鑿未嘗敢以耗氣也必齋以靜心器之所以疑神者其是與

又曰祝宗人玄端以臨牢筴說曰汝奚惡死吾將三月犧汝十日戒十日齋藉白茅加汝肩尻于彫俎之上

韓子曰燕王好巧衛人請以棘刺之端為母猴成功衛人曰君欲觀之半歲不入宮不飲酒食肉雨霽日出視之晏

陰之閒而棘刺之母猴乃可見也燕王因養之不能觀也搜神記曰王業和帝時為荊州刺史每出行部沐浴齋潔以祈于天地當啓佐愚心無使有枉百姓在州七年惠風大行苛慝不作

儼

禮記月令曰季春日命國儼九門磔攘以畢春氣洪範傳曰言之不從則有犬禍犬屬金也故磔之於九門所以抑金扶木畢成春功東方三門不磔春位不殺其盛德所在無所攘又曰仲秋日天子乃儼以達秋氣此儼陽氣也陽暑至儼以通秋氣方欲助秋故不磔犬

又曰季冬日命有司大儼旁磔以送寒氣大儼為歲終逐氣故周官命方相氏率百隸索室驅疫以逐之旁謂王城四旁十二門也磔謂磔犬於門也春磔九門冬禮大故偏磔於十二門所以扶陽抑陰之義犬屬金冬盡春興春為木故殺金以助木氣

又郊特牲曰鄉人禘逐強鬼也禘或為獻或為儼孔子朝

太平御覽卷五百三十一

服立于阼存室神也神依人也

禮記外傳曰方相氏之官歲有三時率領群隸驅索厲疫之氣於宮室之中亦攘送之義也天以一氣化萬物五帝各行其德餘氣留滯則傷後時謂之不和而災疫興焉大儺者貴賤至於邑里皆得驅疫命國儺者但於國城中行之耳名之儺者取群隸為儺儺之聲

周禮夏官曰方相氏掌蒙熊皮黃金四目玄衣朱裳執戈揚盾帥百隸而時儺以索室毆疫蒙冒也冒熊皮者以驚惡也時儺四時作方相氏以儺却凶也月令季冬命國儺索搜也

續漢書曰先臘一日太儺謂之逐疫其儀選中黃門子弟十二以下百二十人為侏子皆赤幘皂製執太幾方相氏服如周制及十二獸裳衣毛角中黃門行人冗從僕射將之以逐惡鬼于禁中設桃梗鬱蠹葦菱畢執事者皆罷葦

戟桃枝以賜公卿將軍特進諸侯

禮緯曰顓頊有三子生而亡去為疫鬼一居江水是為虐鬼魅鬼一居人宮室區隅善驚人小兒於是常以正歲十二月令禮官方相氏蒙熊皮黃金四目玄衣纁裳執戈揚楯帥百隸及童子而時儺以索室而驅疫鬼以桃弧葦矢土鼓且射之以赤丸五穀播酒之以除疫殃

後魏書曰高宗和平三年十二月因歲除大儺之禮遂耀兵武更為制令步兵陣於南騎士陣於此各擊鍾鼓以為節度其步兵所衣青赤黃黑別為部隊楯稍矛戟相次周迴轉易以相赴就有飛龍騰虵之變為函箱魚鱗四門之陣凡十餘法踞起前却莫不應節陣畢南北二軍皆鳴鼓角衆盡大譟各令騎將交去來挑戰步兵更進退以拒擊南敗北捷以為盛觀自後踵以為常

唐書曰舊驅傩子等金吾將軍並具襴笏引入閣門謹  
按大傩者所以驅除羣厲合資威武盛其光儀襴笏之制  
常參朝服舊制未稱今請各依錦繡具帑袂帶儀刀部引  
出入  
建康實錄曰孫興公嘗着戲爲傩至相宣武家宣武覺其  
應對不凡推問之乃興公  
宣城記曰吳時洪矩爲廬陵太守有清稱徵還船輕皆載  
土時歲暮逐除人就乞見土而去  
莊子曰游島問雄黃曰今逐疫出魅擊鼓呼噪何也雄黃  
曰黔首多疾黃帝氏立巫咸使黔首沐浴齋戒以通九竅  
鳴鼓振鐸以動其心勞形趨步以發陰陽之氣飲酒茹葱  
以通五藏夫擊鼓呼噪逐疫出魅鬼黔首不知以爲魅祟  
也

張衡東京賦曰卒歲大儺驅逐群厲方相秉鉞巫覡操劊  
侏子萬童丹首玄裳桃弧棘矢所發無臬飛礮雨散剗瘴  
畢斃燿火馳而星流逐赤疫於四裔然後凌天地絕飛梁  
囚耕父於清泠溺女魃於神潢  
廉品大儺賦曰於吉日之上戊將大蜡千臘烝先茲日之  
酉夕宿潔靜以清澄乃班有司聚衆大儺天子坐華殿臨  
朱軒凭玉几席文旃率百隸之侏于群鼓噪於宮垣



宗廟之制... 禮儀部十... 宗廟... 神主... 易萃卦曰王假有廟... 又渙卦曰風行水上渙先王以享于帝立廟... 尚書逸篇曰嗚呼七世之廟可以觀德... 毛詩文王綿曰乃召司空乃召司徒俾立家室其繩則直... 又闕宮曰新廟弈弈奚斯所作... 又清廟曰清廟祀文王也周公既成洛邑朝諸侯率以祀... 文王焉... 德清明文王象焉故祭之而歌此詩也廟之言貌

太平御覽卷第五百三十一

禮儀部十

宗廟

神主

宗廟

易萃卦曰王假有廟

假至也王以聚至有廟也

又渙卦曰風行水上渙先王以享于帝立廟

尚書逸篇曰嗚呼七世之廟可以觀德

天子立七廟有德之主則為祖宗其

廟不毀故可觀德

毛詩文王綿曰乃召司空乃召司徒俾立家室其繩則直

縮板以載作廟翼翼

又闕宮曰新廟弈弈奚斯所作

又清廟曰清廟祀文王也周公既成洛邑朝諸侯率以祀

文王焉清廟者祭有清明之德者之宮也謂祭文王也天德清明文王象焉故祭之而歌此詩也廟之言貌

也死者精神不可得而見但生時之居於穆清廟肅雖立宮室象貌為之耳成洛邑居攝五年時於穆清廟肅雖顯相於歎辭也穆美肅敬離和相助也箋云顯光也見也於平美哉周公之祭清廟也其禮儀敬且和又諸侯有光明著見之德者來助祭

周禮春官上日小宗伯之職掌建國之神位右社稷左宗廟

禮記曲禮曰君子將營宮室宗廟為先廡庫為次居室為後

又曰問國君之年長日能從宗廟社稷之事矣幼日未能從宗廟社稷之事也

又王制曰天子七廟三昭三穆與太祖之廟而七諸侯五廟二昭二穆與太祖之廟而五大夫三廟一昭一穆與太祖之廟而三士一廟庶人祭於寢

又文王世子曰五廟之孫祖廟未毀雖及庶人冠娶必告

死必赴不忘親也

又禮器曰禮有以多為貴者天子七廟諸侯五大夫三士

一又明堂位曰山節藻梲視廟重檐刮楹達鄉反坫出尊崇

坫康珪䟽屏天子廟飾也山節刻構楹為山也藻梲謂侏儒柱畫為藻文也復廟重屋也

重檐重承壁材也刮刮摩也鄉屬謂夾戶牕也每室為八牕為四達反坫反爵之坫也出尊當尊南也唯兩君為好既獻反爵其上禮君尊於兩楹之間也崇高也康讀為亢龍之亢屏謂之樹今眾思也刻之為雲氣蟲獸如今闕上為之

又雜記曰成廟則釁之其禮祝宗人宰夫雍人皆爵弁純

衣雍人舉羊升屋中屋南面封羊血流于前乃降門夾室

皆用雞凡宗廟之器其名者成則釁之以豶豚宗廟名器謂罇彝之屬

又祭法曰天下有王分地建國置都立邑設廟祧壇墀而

祭之乃為親疏多少之數是故王立七廟一壇一壇曰考  
廟曰王考廟曰皇考廟曰顯考廟曰祖考廟皆月祭之遠  
廟為祧有二祧享嘗乃止去祧為壇去壇為墀壇墀有禱  
焉祭之無禱乃止去墀曰鬼諸侯立五廟一壇一壇曰考  
廟曰王考廟曰皇考廟皆月祭之顯考廟祖考廟享嘗乃  
止去祧為壇去壇為墀壇墀有禱焉祭之無禱乃止去墀  
為鬼大夫立三廟二壇曰考廟曰王考廟曰皇考廟享嘗  
乃止顯考祖考無廟有禱焉為壇祭之去壇為鬼適士二  
廟一壇曰考廟曰王考廟享嘗乃止顯考無廟有禱焉為  
壇祭之去壇為鬼官師一廟曰考廟王考無廟而祭之去  
王考為鬼庶士庶人無廟死曰鬼廟之言貌也宗廟者先  
也超上意也封土曰壇除  
地曰墀書曰三壇同墀  
又中庸曰武王纘大王王季文王之緒壹戎衣而有天下

身不失天下之顯名尊為天子富有四海之內宗廟饗之  
子孫保之

左傳桓公曰宋華父督已殺孔父而殺殤公召莊公於鄭  
而立之以親鄭以郕大鼎賂公夏四月取郕大鼎于宋戊  
申納于太廟非禮也

又桓公曰清廟茅屋以茅飾屋著儉也清  
廟肅然清靜之稱

又僖上曰震夷伯之廟罪之也於是展氏有隱慝焉  
又文公下曰太室之屋壞書不恭也

又成公三年曰甲子新宮災三日哭宣公神主新入廟故  
謂之新宮書三日哭

又襄二曰吳子壽夢卒臨於周廟禮也周廟文王廟也周  
公出文王故魯立  
其廟也凡諸侯之喪異姓臨於外同姓臨於廟是故魯為諸  
姬臨於周廟

公羊傳文公曰世室屋壞世室者何魯公之廟也周公稱

太廟魯公稱世室羣公稱宮

穀梁傳成公曰新宮災三日哭新宮者禰宮也禰父也成公之父宣宮也

孝經曰宗廟致敬不忘親也

又曰為之宗廟以鬼享之宗者尊也廟者貌也先祖之尊貌所居中宮何以為人死精靈

歸乎天形體不藏存之即存不存則亡明先祖神死依人也

孝經援神契曰廟所以尊祖也

論語八佾日子入太廟每事問或曰孰謂鄒人之子知禮

乎入太廟每事問子聞之曰是禮也

家語曰孔子在齊景公造焉左右白曰周使至言先王廟

災景公曰何王廟孔子曰此必釐王廟夫釐變文武之制

而作玄黃華麗之飾故天殃其廟焉有頃左右報所災者

釐王廟景公曰善哉聖人之智過人遠矣

又曰孔子曰吾於甘棠見宗廟之敬也甚矣思其人猶愛

其樹尊其人必敬其道也

史記曰秦始皇巡隴西北地出雞頭山過回中應劭曰回中在安定

高平孟康注曰作信宮渭南更命信宮為極廟象天極廟

道通驪山作甘泉前殿築甬道應劭曰築垣

又曰高祖崩羣臣皆曰高祖起細撥亂令郡國諸侯各立

高祖廟以歲時祠及孝惠五年思高祖之悲樂沛宮為高

祖原廟徐日光武紀曰上幸豐祠高祖於原廟謂

原再也先既已立廟今又再立故謂之原

漢書曰惠帝為東朝長樂宮及間往來數蹕煩民乃作復

道方築武庫南叔孫通奏事因請間曰陛下何自築複道

高帝寢衣冠月出游高廟應劭曰月出高帝衣冠子孫奈何

乘宗廟道上行哉惠帝懼曰急壞之通曰人主無過舉今

已作百姓皆知之願陛下為原廟渭北衣冠月出遊之益  
廣宗廟大孝之本上乃詔有司立原廟惠帝嘗出遊離宮  
通曰古者春嘗果方今櫻桃熟可獻願陛下出因取櫻桃  
獻宗廟上許之諸果獻由世興

又曰文帝作頽城廟服虔曰廟在長安城南文帝作還頽  
見城故名之應劭曰文帝自為之制  
度卑狹若顧望而成故曰頽城賈誼曰目顧城之廟為天  
下太宗與漢無極或曰地名也如淳曰身存而為廟若尚  
書顧命也高祖廟曰原廟文帝廟曰徘徊宣帝廟號樂遊元帝廟  
曰長壽成帝廟曰成陽

又曰梅福上書諫曰武王克殷未下車存五帝之後封殷  
於宋紹夏於杞明著三統示不獨有也是以姬姓半天下  
遷廟之主流出於戶所謂存人以自立也  
又曰宣帝即位尊孝武廟為世宗行所巡狩郡國皆立廟  
告祠世宗廟有白鶴集後庭以立世宗廟告祠孝昭寢有

鴈五色集殿前西河築世宗廟神光興于殿旁有鳥如白  
鶴前赤後青神光又興於房中如燭狀廣川國世宗廟殿  
上有鍾音房戶大開夜有光殿上盡明  
又曰王莽以宗廟未脩張邯說莽曰德盛者文縟宜崇其  
制度宣示海內宜令萬世之後無以復加也莽乃博徵天  
下工匠諸圖畫及吏民以義入錢穀助作者駱驛道路壞  
徹城西苑中建章承光苞陽大臺儲元官及平樂當路陽  
祿館凡十餘所取其材瓦以起九廟  
帝王世紀曰漢景帝廟名德陽宣帝廟名長壽武帝廟名  
龍淵文帝廟名顧成昭帝廟名徘徊  
東觀漢記曰中元元年十月甲申使司空馮魴告祠高祖  
廟呂太后不宜配食以薄太后配遷呂太后于園四時上  
祭

又曰永初六年皇太后入宗廟於世祖廟與皇帝交獻薦如光烈皇后故事

又曰建初四年八月上以公卿所奏明德皇后在世祖廟坐位駁議示東平憲王蒼蒼上言文武宣元裕食高廟皆以后配先帝所制典法設張大雅曰昭哉來御從其祖武又曰不憊不忘率由舊章明德皇后宜配孝明皇帝

袁山松後漢書曰天子自雒陽遷都長安初長安遭赤眉亂宮室焚盡唯有高廟遂居之

漢雜事曰光武弃天下以再受命復漢祚更起廟稱世祖孝明臨崩遺詔遵儉無起寢廟藏主於世祖廟孝章不敢違是後遵奉藏世祖廟如孝明之禮而園陵皆自起寢孝明廟曰顯宗孝章曰肅宗是後踵前孝和爲穆宗孝安曰敬宗孝順曰恭宗孝桓曰威宗今雒陽諸陵皆晦望三十

四氣伏社臘及四時上飯太官送用物園令食監典省其親陵一所宮人隨鼓漏理破枕具盥水陳嚴具天子以正月五月供畢後上原陵以次周遍公卿百官皆從四姓小侯諸冢婦凡與先君有瓜葛者及諸侯王大夫郡國計吏匈奴朝者西國侍子皆會尚書官屬西除下在先帝神坐後大夫計吏皆當前下占其郡國穀價四方改異欲先帝竟神具聞之也遂於親陵各賜計吏而遣之

魏書曰辛酉有司奏造二廟立文皇帝廟與高祖合祭親盡以次毀特立武皇帝廟四時享祀爲魏太祖萬載不毀吳錄地理志曰會稽有禹廟始皇配食王朗爲太守黜之王隱晉書曰太康十年太廟成遷神主于新廟賜王公以下至司馬督子弟官賜作廟者帛

漢晉陽秋曰武帝改營大廟南致荆山之木西採華山之

石鑄銅柱十二塗以黃金鏤以百物填以丹青綴以珠玉以麗之也

晉書禮志曰武帝太始二年有司奏置七廟宜權立一廟羣臣議上古清廟一宮周制七廟舜承堯禪受終文祖則虞氏不改唐廟因仍舊宮可依有虞故事

宋書禮志曰晉太始二年有司奏天子七廟宜如禮營建帝重其役詔宜權立一廟於是羣臣議奏上古清廟一宮尊遠神祇逮至周室制爲七廟以辯宗祧聖旨深弘遠跡上世

後魏書曰武定六年二月將營齊獻武王廟議定室數形制兼度支尚書崔昂等議按禮諸侯五廟太祖及親廟四今獻武王爲始封之君便是太祖既通在親廟不容立五室且帝王親廟亦不過四今宜四室二間兩頭一頰室厦

頭徘徊鷓尾又按禮圖諸侯廟止開南門而二王後附祭儀注云執事者列於廟東門之外既有東門明非一門獻武禮數既隆備物殊等准據今廟宜開四門內院南面開三門餘面及外院四面皆一門

齊書禮志曰世祖夢太祖曰宋氏諸帝嘗在大廟從我求食可別爲吾祠上乃勅豫章王妃庾氏四時還青溪宮舊宅處內舍堂奉祠二帝二后牲牢服章用家人禮

晉起居注曰武帝太安中詔曰往者仍魏氏舊廟處立廟既壅翳不顯材木弱小至今中間有跌撓之患今當脩立不宜在故處太僕寺南臨甬道地形顯敞更於此營之主者依典禮施行

晉書曰栢玄篡問衆曰朕其敗乎曹靖之對曰神怒人怨臣實懼焉玄曰人或可怨神何爲怒對曰移晉宗廟飄泊

無所大楚之祭不及於祖此其所以怒也

白虎通曰禮聖王所以制宗廟何曰生死殊路故敬鬼神而遠之所以有屋何所以象生之居

又曰臣待放於郊若不絕其祿者以其祿三分之一與其妻長子使得祭其宗廟賜之環卽還賜之玦則去

又曰王者立宗廟何緣生以事死敬亡若事存欲立宗廟而祭之此孝子之心所以追繼養也

釋名曰廟貌也先祖形貌所在寢寢也所寢息也

三輔故事曰光武至長安宮闕燒盡徙都洛陽取十二陵合爲高廟作十二室太常卿一人別治長安主知齋祠事謂之高廟

漢武故事曰宣帝立孝武廟於河東告祠日見一人騎馬馬異於常馬持尺一札賜將作丞文曰汝績克成賜汝金

一斤因忽不見札乃變爲金一斤

蜀王本紀曰禹生於石紐禹母吞珠孕禹坼副而生禹於塗山娶妻生子名啓於今塗山有禹廟亦爲其母立廟

三輔黃圖曰王莽於長安城南作九廟又曰太上皇廟在長安香街南

墨子曰昔三苗大亂天命殛之雨血三朝龍生於廟說苑曰衛孫文子問王孫賈曰吾先君之廟小欲更之可

乎對曰古之君子以儉爲禮今之君子以大易之相譚新論曰王莽起九廟以銅爲柱葺帶金銀錯鏤其上

王嬰古今通論曰夏曰世室世世祭祀之也殷曰重屋重夏爲屋四雷周曰宗廟尊其生存之貌示不死之故致之

於更楚辭天問序曰屈原放逐彷徨山澤仰天歎息楚有先王



之廟及公卿祠堂圖畫天地山川神靈琦瑋譎詭及古賢聖怪物行事周流罷俗休息其下仰見圖畫因書其壁呵而問之

晉諸公讚曰王俊字彭祖為幽州刺史尋洛陽破後承制建行臺以宗廟焚毀設壇望祀七室及功臣配食

神主

禮記曲禮曰措之廟立之主曰帝

又檀弓下曰愛之斯錄之也敬之斯盡其道焉重主道也

躬主綴重焉綴連也躬人作主而周主撤重焉周人作主

又曾子問曰喪有二孤廟有二主禮與孔子曰天無二日國無二王嘗禘郊社尊無二上未知其為禮也昔者齊桓公亟舉兵作偽主以行及反藏諸祖廟廟有二主自桓公始也

禮記外傳曰人君既葬之後日中虞祭即作木主以存神

未葬以前懸重於庭以代主也廟主用木者木落歸本有始終之義人之

無不死木生於亥又天子廟主長尺二寸諸侯一尺四向

落於亥是歸本也漆書謚號葬後孝子心目無所觀故用以

主其神也

公羊傳文公曰二年丁丑作僖公主虞主用桑練主用栗

作僖公主不時也

左傳莊公曰先君桓公命我先人典司宗祏桓公鄭始受封君也宗祏

宗廟中藏主石室言已世為宗廟守臣

又文公曰葬僖公緩也作主非禮也凡君薨卒哭而祔祔

而作主特祀於主尸柩已遠孝子思慕烝嘗禘於廟

又昭五日使祝史徙主祔於周廟告于先君祔廟主石函周廟厲王廟

論語八佾曰哀公問社於宰我宰我對曰夏后氏以松殷人以柏周人以栗

五經異義曰謹按大夫以石爲主禮無明文大夫士無昭穆不得有主今山陽民俗祀有石主

又曰春秋左氏傳曰徙主石於周廟言宗廟有郊宗石室所以藏栗主也虞主所藏無明文也

又曰今公羊說卿大夫士非有土子民之君不得禘祫序昭穆故無木主大夫束帛依神土結茅爲叢

又曰論語哀公問社於宰我宰我荅夏后氏以松夏人都河東河東宜松也殷人以柏殷人都亳宜柏也周人以栗周人都澧鎬澧鎬宜栗也

五經要義曰木主之狀四方穿中央以達四方天子長尺二寸諸侯長尺皆刻謚於背也

又曰主者神象也凡虞主用桑桑猶喪也喪禮取其名練王用栗栗者敬也祭禮取其恭  
五經通議曰諸侯會天子則以方明爲主覲禮云方明木也其形四方六面上玄下黃東青南赤西白北黑方明者上下四方神明之象也

謝承後漢書曰赤眉盆子去長安西入右扶風鄧禹至長安中昆明池率諸將齋戒擇吉日入城謁高帝廟修禮祠祭勞賜吏士因收十二帝神主以故高廟郎來輔守高廟令行京兆尹承事按行掃除諸園陵爲置吏卒奉守焉遣輔奉主詣京師

王隱晉書曰李裔字宣伯父敏爲公孫度所迫浮海莫知所終裔以父母不知存亡設木主以奉之由是發名  
晉起居注曰孝武太元二十年簡文皇帝宣太后正號神

主移廟戊寅口詔移神主可停前後鼓吹  
摯虞決疑要注曰廟主藏於戶外西墉之中有石函名曰  
宗祏古者帝王出征於車載遷廟之主及社主以行秦漢  
魏不載主也

唐書曰祔順宗于廟遷中宗神主于夾室有司以中宗爲  
中興之君當百代不遷宰臣召史官蔣武問之武對曰中  
宗以弘道元年於高宗柩前卽位時春秋已壯矣及母后  
篡奪神器潛移其後賴張柬之等同謀國祚再復此蓋同  
於反正恐不得號爲中興之君凡非我失之自我復之謂  
之中興漢光武晉元帝是也自我失之因人復之晉孝惠  
孝安是也今中宗與惠安二帝事同卽不可爲不遷主矣  
白虎通曰祭所以有主何本神無方孝子以主係心  
又曰所以虞而立主何孝子旣葬日中反虞念親已沒棺

柩已去悵然失望彷徨哀痛故設桑主以虞所以慰孝子  
之心虞安其神所以用桑者始與神相接三王俱以桑  
說文曰祏宗廟主也周禮有郊宗石室一曰大夫以石爲  
主從示從石石亦聲也

太平御覽卷第五百三十一

太平御覽卷第五百三十一  
禮儀部十一  
社稷  
農  
靈星

太平御覽卷第五百三十一

禮儀部十一

社稷

農

靈星

社稷

尚書禹貢曰海岱及淮惟徐州厥貢惟土五色王者封五色土為社

稷建諸侯則各割其方色土與之使立社

又召誥曰越翌日戊午乃社于新邑牛羊豕各一

尚書曰湯既勝夏欲遷其社不可作夏社言夏社不可遷之義

尚書逸篇曰太社唯松東社唯柏南社唯梓西社唯栗北

社唯槐天子社廣五丈諸侯半之

周書曰諸侯受命于周乃建太社于國中其壝東青土南

赤土西白土北驪土中霤以黃土將建諸侯取方一面之

土苴以白茅以土封之故曰列土

毛詩閔予小子載芟曰春耕籍田而祈社稷也載芟載柞其耕澤澤

又曰良耜秋冬報社稷也屢屢良耜俶載南畝

周禮地官曰大司徒之職設其社稷之壇而樹之田主各以其野之所宜木遂以名其社與其野

又曰小司徒掌凡建國立其社稷

又封人曰封人設王之社稷壇為畿封而樹之

又春官上大宗伯曰以血祭祭社稷鄭玄注曰陰祀曰血貴氣臯

又小宗伯曰宗伯掌建國之神位右社稷

又春官下喪祝曰喪祝掌勝國邑社稷之祝號以祭祀禱祠焉馬融曰所討國所討邑猶立其社稷

又秋官士師曰若祭勝國之社稷則為之尸

又冬官曰匠人營國左祖右社而朝後市王官所居也祖宗廟面猶鄉也

王官當中經之涂也

禮記月令曰仲春擇元日命民社為祀社稷也春事與故祭之祈農祥元日謂近

春分前後戊日元吉也仲秋擇元日命民社賽秋成也元日謂近秋分前後戊日

又曲禮曰問國君之年長曰能從宗廟社稷之事幼曰未能從宗廟社稷之事

又檀弓曰衛獻公出奔反於衛及郊將班邑於從者而後入柳莊曰如皆守社稷則執執羈勒而從如皆從則執守社稷

又郊特牲曰社祭土而主陰氣也君南嚮於北墉下荅陰之義也墉謂之墉北墉社內日用甲用日之始也天子太社必受霜

露風雨以達天地之氣也是故喪國之社屋之不受天陽也薄社北牖使陰明也絕其陽通其陰而已薄社所以神也

地之道也地載萬物天垂象取財於地取法於天是以尊

天而親地也故教民美報焉家主中霤而國主社示本也  
中霤亦唯為社事單山里唯為社田國人畢作唯社丘乘  
土神也

共粢盛所以報本反始也  
又祭法曰王為群姓立社曰太社王自為立社曰王社諸  
侯為百姓立社曰國社諸侯自為立社曰侯社大夫以下  
成羣立社曰置社群衆也太夫以下至庶人也大夫不得  
特立社與民族居百家以上則共立一

社今之里  
社是也

又祭義曰建國之神位右社稷而左宗廟周尚  
左也

禮記外傳曰社者五土之神也稷者百穀之神也一云稷  
是原隰

之神原隰  
宜種百穀天子為天下之人立社曰太社壇方五丈諸侯

為境內之民立社曰國社又有王社侯社者天子諸  
侯別自立社私有禱求地之

勢有異生物各隨所宜九州之人各居其土食其利者各

報祭之是謂神地  
之道者籍田之後則告為將  
耕也五穀既登又報功

也國以民為本人以食為天故建國君民先命立社也地

廣穀多不可徧祭故於國城之內立壇祭之親之也日用

甲尊之也天有十日甲為首也周公卜洛建王  
都戊申社于新邑自此皆用戊日唯天子祭

天地諸侯祭社稷而已

又曰社樹各以其土所宜之木河東宜松  
周雖宜栗社主用石石土  
中堅

者天子親征則載社主行有罪者誅之於車前

左傳僖公曰宋公使邾文公用鄆子於次睢之社欲以屬

東夷此水次有妖神  
東夷皆社祠之司馬子魚曰古者六畜不相為用小

事不用大牲而況敢用人乎祭祀以為人也民神之主也

用人其誰饗之

又襄四曰君民者豈以陵民社稷是主臣君者豈為其口

實社稷是養故君為社稷死則死之為社稷亡則亡之

又昭七日魏憲子問於蔡墨曰社稷五祀誰氏之五官也

對曰少暉氏有四叔賈逵注曰少暉黃帝之後日重曰該  
 日脩曰熙實能金木水成性也使重為勾芒該為蓐收脩  
 及熙為玄冥此其三祀也顓頊氏有子曰黎為祝融正官  
 黎當高辛氏之世故外傳共工氏有子曰勾龍為后土  
 日黎為高辛氏之火正也共工氏有子曰勾龍為后土  
 大暉之後炎帝之前九有者此其二祀也后土為社稷  
 也其稷子佐顓頊能平水土田政也掌田之官有烈山氏之子曰柱為稷烈山炎帝之  
 自夏以上祀之周棄亦為稷周棄周祖后稷也自商以  
 來祀之商殷也柱之弟至湯又定上日月夫祝社稷之常隸也賤社稷不動祝不出境  
 官之制也謂國遷公羊傳隱公曰宋宣公謂繆公曰以吾愛與夷則不若愛  
 汝以為社稷宗廟主則與夷不若汝蓋終為君矣  
 又莊公日日有蝕之鼓用牲于社求于陰之道也以朱絲

縈社或曰脅之或曰為鬮恐人犯之故縈之也  
 又僖公曰邾婁人執郈子用之社蓋叩其鼻以血社稷也  
 又哀公曰亳社災亳社者何亡國之社亳社者先世社者  
 封也封土其言災何亡國之社掩其上而柴其下故火得  
 春秋潛潭巴曰里社鳴此里有聖人生其响百姓歸之均  
 注曰鳴則教令行若湯放桀也鳴鳴之怒者也  
 論語八佾曰哀公問社於宰我宰我對曰夏后氏以松殷  
 人以柏周人以栗曰使民戰栗孔安國注曰凡建邦立社  
 不本其意妄為之說因周栗使云使民戰栗也  
 孝經說曰社土地之主也地廣不可盡敬故封土為社以  
 報功稷五穀之長也穀衆不可遍祀故立稷神祭之  
 五經通義曰王社籍田中為千畝報功也文家右社稷左  
 宗廟何文家據地而王地道長右得事宗廟以有社稷故

右之也質家左社稷右宗廟社皆有壇者飾也有木者土當生萬物莫善於木

五經異義曰今民謂社神爲公社位上公非地祇也

漢書郊祀志曰高祖時天下已定詔御史令於豐治粉榆社常春以羊彘祠之也

又郊祀志曰稷者百穀之主所以奉宗廟供粢盛人所食以生活也王者莫不尊重親祭自爲之主禮如宗廟禮記

曰唯祭宗廟社稷爲越紼而行事聖漢興禮儀稍定已有官社未立官稷臣贊按高紀除秦社稷立漢社禮所謂太

見漢紀今未立官稷至此始立之也遂於官社後立官稷以夏禹配食官社

后稷配食官稷種穀樹又曰陳平既娶張氏女資用益饒遊道日廣里中社平爲宰分肉甚均里父老曰陳孺子能爲宰乎曰使平得宰天

下亦如此肉也

又曰欒布吳楚反時以功封爲郇侯復爲燕相齊燕之間皆爲立社號曰欒公社

續漢書曰每月朔旦太史上其月曆有司侍郎尚書見讀其令奉行其正朔前後各二日皆牽羊酒至於社下以祭

日變割羊以祠社用救日變執事者冠長冠衣皂單衣絳領袖緣中衣絳絺袴以行禮如故事

又曰建武二年立太社稷於雒陽在宗廟之左社稷之右皆方壇無屋有墻門而已二月八月及臘一歲三祠皆太

牢具使有同祠郡縣置社稷太守令長侍祠牲用羊豕唯州所治有社無稷古者師行有載社主不載稷也

晉書禮志曰前漢但置官社而無官稷王莽置官稷後復省故漢至魏但太社有稷而官社無稷故常二社一稷



後魏書曰天平四年四月七帝神主既遷於太廟太社石  
主將遷於社宮禮官云應用幣中書侍郎裴伯茂時爲祝  
文伯茂據故事太和中遷社高祖用特不用幣遂以奏聞  
于時議者或引大戴禮遷廟用幣今遷社宜不殊伯茂據  
尚書召詰應用牲詔遂從之八  
宋書禮志曰晉元帝建武元年又依洛京立二社一稷其  
太社之祝曰地德普施惠存無疆乃建太社保佑萬邦悠  
悠四海咸賴嘉祥其社之祝曰坤德厚載王畿是保乃建  
帝社以神地遁明祀惟辰景福來造禮左宗廟右社稷歷  
代遵之故洛京社稷在廟之右而江左亦然也  
又曰祠太社祭太稷常以歲二月八月二社日祠之  
唐書曰天寶中升社稷五星爲大祀詔日祭之爲典以陳  
主敬名或不正是相奪倫况社稷乎祐百代蒙其福日月

照臨五星叶其紀兆庶允殖下土式瞻既超言象之外須  
極尊嚴之禮列爲中祀頗紊大猷自今已後社稷及日月  
五星並升爲太祀仍以四時致祭  
六典曰仲春上戊祭太社以后土氏配焉祭太稷以后稷  
氏配焉

家語曰孔子曰古之平水土及播植百穀者衆矣然唯勾  
龍兼食於社而弃爲稷易代奉之無敢益者明不可與等  
也

莊子曰岷蟲之民相與言曰庚桑之始來吾洒然異之今  
吾日計之而不足歲計之而有餘庶幾其聖人乎子胡不  
尸而祝之社而稷之也

又曰匠石之齊至于曲轅見櫟社樹其大蔽千牛匠者  
百圍其高臨山千仞而後有枝其可以爲舟者旁十數觀

者如市

淮南子曰夫窮鄉之社扣瓮拊甒相和而歌自以為樂也  
嘗試為之擊建鼓撞巨鍾乃知夫瓮甒之足羞也

又曰禹勞力天下死而為社勞力謂治水功死周棄作穡

死而為稷種曰稼斂曰穡死

託祀於后土之中

揚雄法言曰或問近世社稷之臣曰若張子房之智陳平  
之無忤絳侯勃之果霍將軍之勇終之以禮樂則可謂社  
稷之臣矣

太公金匱曰武王問太公曰天下精神甚眾恐後復有弑  
余者何以待之師尚父曰請樹槐於王門內王路之右  
起國社築垣墻祭以酒脯食以犧牲尊之曰社客有非常  
先與之語客有益者入無益者距歲告以水旱與其風雨  
澤流悉行除民所苦

白虎通曰王者所以有社稷何為天下求福報功人非土  
不立非穀不食土地廣博不可遍敬五穀眾多不可一一  
而祭故封土立社祀之而示尊稷五穀之長立稷而祀之  
稷者得陰陽和氣而為用又多故為長歲再祭之

又曰祭社稷有樂乎禮記曰金石之樂用之於宗廟社稷  
又曰王者諸侯必有戒社何示存亡也明為善者得之為  
惡者失之春秋公羊傳曰亡國之社奄其上柴其下郊特  
牲記曰喪國之社屋之示與天地絕也

蔡邕獨斷云天子太社五色土為壇皇子封為王者授之  
太社之土以所封之方色藉以白茅歸國以立社故為之  
茅社也

陳留風俗傳曰東昏縣者衛地故陽武之戶牖鄉也漢相  
陳平家焉少為社宰今民祀其社

邠原別傳曰原避地遼東遼東以虎爲患自原之邑落獨無虎患嘗行而得遺錢拾以繫樹枝此錢不見取而繫錢者逾多原問其故荅者謂之社樹原惡其由己而成妄祀乃辯之於是里中遂斂其錢以爲社供里老爲之誦曰邠君行仁邑落無虎邠君行廉路樹成社

列異傳曰大司馬河內陵蕤字聖卿少時病虐逃社中有人呼社邱社邱聖卿應曰諾起至戶中人曰取此書去得素書一卷譴劾百鬼法所劾輒効

搜神記曰中興初有應嫗者生四子而寡見神光照社試探之得黃金自是諸子宦學並有才名至瑒七世顯

劉楨京口記曰虎社中村故老相傳云昔有虎於社中產因以爲名

荊州記曰葉縣東百步有縣故城西南四里名伍伯村有

白榆連李樹異幹合條高四丈餘士民奉以爲社

世說曰阮宣子伐樹人有止之宣子曰若樹而爲社伐樹

則社移社而爲樹伐樹則社亡矣

習鑿齒逸民高士傳曰董威輦不知何許人忽見於洛陽

白社中

戴延之西征記曰洛陽建春門外道北有白社董威輦所住也去門二里有牛馬市嵇公臨刑處也

博物志曰子路與子貢過社社樹有鳥子路搏鳥社神牽子路于貢說之乃止

又曰周之正月受社牲之首以出種子帝藉蠶又受社雍及祭以沐蠶種上辛乃射黑牲于帝郊以祈來年之豐二月司空開冰射桃孤棘矢五發以御其災

述異記曰庾邈與女子郭凝通詣社約不二心俱不婚媾

經二年凝忽暴亡邈出見疑云前北村遂遇強梁抽刀見  
逼懼死從之不能守節為社神所責心痛而絕人鬼異路  
因下泣矜之也  
蔡邕陳留東昏庫上里社碑曰惟斯庫上里古陽武之戶  
牖鄉也秦時有池子華為丞相漢興陳平由此社宰遂相  
高祖尅定天下為右丞相孝平之世虞延為太尉延熹中  
平曾孫放為尚書令以宰相繼踵咸出斯里雖有積德脩  
身之政亦斯社所相乃樹碑頌云  
魏公九錫文曰錫君玄土苴以白茅爰契爾龜用建冢社  
注言亦如天子社稷也  
曹植讚社文曰余前封鄆城侯轉雍丘皆遇荒土宅宇初  
造以府庫尚豐志在繕宮室務園圃而已農桑一所無營  
經離十載塊然守空飢寒備嘗聖朝愍之故封此縣田則

一州之膏腴桑則天下之甲第故封此桑以為田社乃作  
頌云  
應璩與陰夏書曰從田來見南野之中有徒步之士惟而  
問之乃知郎君頃有微痾告祠社神將以祈福聞之悵然  
以增歎息靈社高樹能有靈應哉  
張華朽社賦曰高柏橋南大道傍有古社槐樹蓋數百年  
木也余少居近之後去行路過之則已朽株意有緬然聊  
為之言衰盛之理  
殷仲堪合社文曰夫社之為祀遠哉故大夫以成群斯禱  
里社之興由來尚矣自喪亂流遷舊俗隳廢今二三宗親  
思桑梓之遺風遵先聖之明誥潔齋牲牢庶乎自祐以來  
一曰之澤然三人行必有其師故復選中正立三老者  
惟公理以御衆稽舊章以作憲

卜敬宗櫟社序讚曰余門前有一社樹盤根疏柯似非近世所植抗秀路左流蔭庭宇莊周喻道於商丘之木匠石辨才於曲轅之櫟由斯而觀固可以悟微矣王虞春可樂曰吉辰兮上戊明靈兮唯社百室兮必集祈祭兮樹下濯茆兮葅菲齧菘兮擗鮓縹醪兮浮蟻交觴兮並坐氣和兮體適心怡兮志可

何承天社頌曰社實陰祗稷唯穀元率育萬類協贊乾坤禮記月令曰孟春乃擇元辰天子親載耒耜置之車右率

公卿諸侯大夫躬耕藉田辰亥也謂郊後吉亥享先農於東郊先農神農也續漢書祭祀志曰光武卽位於鄗為壇營於鄗之陽營神

五星及中官星雷公先農風伯雨師四海四瀆名山大川之屬

漢舊儀曰春始東耕於藉田官祠先農先農卽神農炎帝矣祠以一牢百官皆從大賜三輔二百里孝悌力田三老布帛

漢名臣奏曰黃瓊上言先王制典藉田有曰司徒咸戒司空除壇先時五日有協風至卽齋宮饗燕載耒耜誠重之也先農之禮所宜躬親以迎春和以致時風沈約宋書禮志曰元嘉二十一年帝親耕乃立先農壇於藉田高四尺方丈為四出陛陸廣五尺外加埒方十丈車駕未到司空大司農率太祝及眾執事質明以太牢祀祭器用社稷器祠畢頌餘胙於奉祠者舊典先農又都列於郊祭

靈星

周書作雒曰設兆于南郊以祀上帝配以后稷農星先王

皆與食

毛詩閔予小子曰絲衣繹賓尸也高子曰靈星之尸也又釋

祭也天子諸侯曰繹以祭之明日卿大夫曰賓尸與祭同日周曰繹商曰彤也

漢書郊祀志曰高祖時或言周興而郃立后稷之祠至今

血食天子於是制詔御史其令天下立靈星祠張晏曰龍

天田即農祥也晨見而祭之常歲時祀以少牢

三輔舊事曰漢靈星祠在長安城東十里

淮南子曰君人之道其猶靈星之尸儼然嘿端而受福也

嵩高山記曰漢孝武遊登五岳尊事靈星遂移祠置岳南

脚上築作殿壇周迴立瓦屋行種松柏前五百步臨大道

立兩石闕極高大

太平御覽卷第五百三十二

